

東
華
續
錄

東華續錄

同治三十二

臣王先謙敬編

臣張式恭恭校

三月壬寅李鴻章奏郭松林於正月二十七日由宜興拔隊進攻張渚沿途殺賊千餘二十八日易用剛等軍分三路鈔擊生擒賊匪千餘名殺斃無算賊眾棄營遁走當將張渚賊壘十餘座一律踏平二十九日戈登由徐舍進攻沿途賊卡掃蕩淨盡侍逆李侍賢敗退溧陽欲遁入城城中賊目吳人杰等久思反正閉門不納城內老賊先期竄往江西見畱二三萬眾多係三江兩湖之人二月初一日吳人杰等率同薙髮迎降郭松林等立允招撫初二日遂將溧陽縣城收復戈登帶常勝軍入城駐守臣當飭李恆嵩等將降眾妥爲遣散分別安置李侍賢聞已逃往湖州泗安一帶其

所部死黨有帶赴湖州者有竄往常州者郭松林等乘勝進剿金壇援賊初四日抵楊巷地方偽列王偽襄王率賊船千餘遙擁而來王東華督水師痛剿逆眾棄舟登岸郭松林督軍奮力鈔襲殺斃淹斃並焚奪賊船無算陣斬偽列王及頭目多名各軍追至金壇南門初五日賊由西南門衝出復爲郭松林等擊敗入城城外賊卡數座一律埽平常州護逆先經糾合丹陽句容踞逆偽英王叔僞然王僞漳王忠逆之子眾號十餘萬由常西繞至城北築營數十座屢撲劉銘傳等營盤均卽擊退李鶴章商調楊鼎勳二營周盛波二營進逼西門紮營二月初一日護逆等率眾來撲經楊鼎勳等痛擊移時賊陣大亂我軍分路追殺斃匪數千人賊見圍城各營無閒可乘我軍愈逼愈緊遂繞竄腹地圖解常圍初四日偽英王叔忠逆之子糾合數僞王死黨及宜興溧陽敗賊循江岸

迤東圩塘夏港青山一路冒雨急趨初五日奄至江陰之南隅距城二三里初六七等日衝至周莊華墅楊厠等處初十日竄撲常熟縣城十一日竄至福山於是江陰常熟無錫三城同時告警

卽調郭松林王東華星速回援飭常州各營堅壁勿戰調李鶴章酌帶小隊回守無錫楊鼎勳張樹聲由常州抽勁旅三千橫紮江陰之焦甸青陽以截該逆歸路黃中元兩營由宜興回援並以常熟守兵單薄飭程學啟調鄭國魁水陸三營馳往助戰一面由蘇州添派官兵趕赴常熟保此要地賊股併聚三縣界內而常熟圍攻尤急蔓延張涇橋東亭直撲無錫十三日李鶴章登陴督守派黃中元等帶隊迎勦追過八字橋二十餘里擒斬千餘人郭松林帶馬隊分擊堰橋另股又斃百餘名無錫之圍遂解張樹聲由焦甸進勦南牖花山一帶楊鼎勳由青陽進勦都橋華墅一帶日有

擒馘初八初九十二等日該逆圍撲江陰經守將駱國忠等合力擊退城圍亦解逆眾以常熟有糧可掠欲合力攻破此城再圖蘇錫北自楊厓福山南至顧山王莊縣互數十里城中望援甚急適黃翼升帶淮揚水師四營由揚州折回畱一營協守江陰自親督三營於十四日由白茅口繞進常熟王東華水師三營亦至鄭國魁與李昭慶十五日起至常熟城內郭松林由嚴家橋進內外夾擊賊眾大潰李昭慶飭賈宏材等猛攻北門賊壘燒斃悍賊數百名生擒數十名我軍乘勢踏平東門賊壘五座郭松林十六日行至王莊僞滕王僞利王二三萬眾迎敵郭松林領隊衝入賊敗至橋口官軍一擁過橋賊眾返奔追殺二十餘里將顧山陳市踞賊一氣掃除復由大河徑趨常熟僞英王叔與忠逆之子帶隊來撲我軍槍礮環擊該逆敗至浮橋黃翼升等水師四路夾擊將逆眾

衝作數段揜斬無算追至城西又與鄭國魁等併力截勦賊紛紛潰散十七日乘勝跟追踏毀劉家橋福山賊壘數座郭松林等遂循江岸追往楊厘鄭國魁等循顧山追勦腹地常熟之圍立解查金陵於正月杪合圍忠逆實在城內曾國荃函稱逆糧接濟已斷三四月間可望克復見在常州丹句各股與金陵消息難通郭松林等連復宜興溧陽則皖浙道路又無可竄是以乘隙死力衝突幸各軍分守尙嚴赴援甚速冀可保全大局見仍飭黃翼升等前後夾勦務將此股敗賊悉數殲除李鶴章劉銘傳再乘勝偪攻常州迅期得手又奏嘉興官軍連破東北門外賊壘後程學啟先令道員吳毓芬三營扼紮城邊漏澤寺石卡正月二十八日程學啟親督各營圍攻一面趕築礮臺用炸礮轟塌城垣十餘丈城賊拌死抵拒程學啟揮軍冒險擁上賊以整桶火藥然擲城下何安泰

中槍陣亡弁勇傷亡已數百名遂仍收隊適湖州賊首黃老虎冀援嘉興竄西蕩壇邱等處另股由卯塔內竄盛澤鎮進圖王江涇後路營盤程學啟急令王永勝鄭國魁等同援於二十九日擊走之查嘉興四面大河環繞該逆恃險死拒此次猛攻幾可得手以將士傷亡過多不得不略爲休息礮臺礮架均須修築程學啟仍督隊晝夜轟擊以期速拔堅城總兵何安泰係程學啟所部最爲出色之將謀勇兼裕因攻城過猛中槍殞命實堪悼惜該總兵愛民恤士陣亡之日勇丁痛哭靈輿所過百姓泣送見據紳士等呈請建立專祠合無仰懇 天恩飭部照提督陣亡例從優議卹並於嘉興府死事地方建立專祠以慰忠魂副將郭興發堵剿湖州援賊受傷身故並請飭部照副將陣亡例議卹又奏正繕摺開據程學啟飛報連日督隊進攻嘉興自二月十六日起滾營紮偏北

門城根猛攻三晝夜用開花大礮轟塌城垣十餘丈我軍搶搭浮橋城頭悍逆拌死堵擊礮石如雨十八日程學啟親率勇士大呼殺入眾隊繼進城上逆屍枕藉猶有悍賊二三千人以洋槍排抵缺口程學啟肉薄以登猝中槍傷暈倒該部將劉士奇等見主將受傷拌死率隊登城縱橫奮擊賊眾潰散遂將嘉興府城克復各軍整隊而入將守城悍逆圍殺淨盡弁勇傷亡亦多程學啟受傷甚重送至蘇城就醫臣親往看視飭醫盡心調治派員照料並令劉秉璋布置城守事宜暫飭劉士奇等竭力防勦上諭內閣李鴻章奏水陸官軍攻克嘉興府城等語此次程學啟進攻嘉興日則往來督隊夜則露坐礮臺指揮照料冒死血戰身受重傷用能攻拔堅城埽除巨逆其志可嘉其功尤偉著李鴻章傳旨嘉獎令其安心醫治以冀速痊仍著該撫詳查勞績奏請獎敘其尤爲出

力之將領各員並著查明一併奏請○李鴻章奏提督銜福山鎮總兵鞠耀乾統帶艇船駐紮福山初聞賊警臣即飭帶兵扼紮海口石壘並以所部佑捷等艇護守藉遏游氛二月十一日賊股猝至乃以眾寡不敵立即潰退並被賊奪去艇船二隻殊屬畏葸無能惟該總兵熟悉海面情形從前協剿鎮江瓜州尙屬著有微勞可否請旨革去提督銜開缺以江南水師參將降補 上諭提督銜江蘇福山鎮總兵鞠耀乾統帶艇船駐紮福山乃當賊股猝至因眾寡不敵立即潰退並被賊奪去艇船實屬畏葸無能惟該員熟悉海面情形從前協剿鎮江瓜州尙有微勞鞠耀乾著革去提督銜開缺以江南水師參將降補用示薄懲○諭議政王軍機大臣等富明阿奏水師擊退竄賊及水陸布置情形馮子材等奏官兵攻克白兔博洛水湖等處逆壘擊退援賊各一摺逆眾由青山

南牖等處攻撲江陰未得逞志另股紛竄浮橋直奔江口經李德麟等開礮轟擊賊始敗遁此股賊匪鋌而走險見已薙髮冒戴頂翎難保不假充官軍冀圖溷迹江北地屬完善富明阿已派兵分防水陸兩路並知照吳棠令藩司萬啟琛通飭所屬文武一體嚴防所籌均尙周密福山一帶有黃翼升水師駐紮諒可無虞其江陰等處要隘口門防守是否嚴密著富明阿吳棠嚴飭水路各軍認真防剿不准令一賊竄犯江北以保完善程學啟帶兵素稱得力見在何處此次賊竄陷福山忠逆如在其內李鴻章正可設計抽調程學啟並得力各軍截其歸路設計將其擒獲則賊勢瓦解未復各城自成破竹之勢想該撫必能見及吳棠擬將黃開榜一軍入江協剿調度亦合機宜著卽飭令該鎮統帶所部師船前往通州一帶沿江分段駐泊與江防艇師互爲犄角以壯聲援富明

阿另片奏刁經明會攻丹陽城賊及收撫白兔降賊情形本日亦經馮子材等奏報惟富明阿據刁經明稟稱白兔降眾因偽賢王二營不降併歸寶堰會同願降各營合攻偽賢王逆壘其白兔及水湖降賊家屬輜重均先送往鎮城一律雉髮投誠等語與本日馮子材所稱攻取白兔該賊匪棄壘而遁各情均不相符仍著富明阿馮子材加意防範毋稍大意並著馮子材魁玉卽督在事諸軍攻拔寶堰賊巢其南路博洛水湖業經攻克馬陵一帶肅清官兵可徑達丹陽著卽相機進取以期節節掃蕩仍應穩慎進取毋爲窮寇所乘並隨時咨商富明阿調派各軍聯絡聲勢揚營所製開花礮子係攻堅利器並著趕緊運赴鎮防以資得手正在寄諭間據李鴻章奏官軍收復溧陽縣城各路敗賊竄併常州西路圍撲江陰常熟無錫各城調派各軍援剿次第解圍連獲大捷並程

學啟督軍攻克嘉興各摺片覽奏欣慰逆眾乘隙內竄幸各軍防守甚嚴該逆受創而去侍逆逃往湖州四安一帶其所部死黨有帶赴湖州者有併入常州者難保不再圖大逞仍當飭令在事各員加意嚴防穩紮穩進其揚庠等處之賊是否尙在盤踞著督飭黃翼升郭松林等前後夾勦務將此股敗賊悉數殲除毋畱餘孽李鶴章劉銘傳卽飭乘勝偪攻常州以期一律削平嘉興已復餘匪飭卽就地埽除湖州援賊黃老虎等被擊回遁卽著督令李朝斌等會同浙軍設法進取程學啟受傷甚重其督軍奮勇深堪嘉尙務當妥爲調治冀速就痊將此由六百里各諭令知之○沈葆楨奏賊匪竄入金谿縣城道員席寶田冒雨疾進由安仁渡河二月初九日馳抵竹橋去金谿二十二里席寶田以兵勢甚單如稍示弱必爲所乘遂誓師決戰派守備魏玉彩等分左右中三路進

攻自督都司金國泰等前往策應左右路之賊不意我軍猝至豕突狼奔我軍縱橫搏擊斬馘各以千計賊望風披靡城外一律肅清中路之軍由揚芳橋埽蕩而入乘勝直逼城根城中突出悍賊萬餘副將邊曉堂等衝盪數十次斃賊極多賊大股突從城東繞出守備張宜道等均受矛傷金國泰腹被重創猶大呼陷陣賊爲辟易邊曉堂等斬其前鋒賊匪數十名另股又由城東欲鈔官軍後路適右路之軍馳至會同夾擊賊遁入城計前後斃賊三千餘人生擒二百餘人救出難民甚多金國泰受傷甚劇旋即殞命十一日偵知城賊震懼欲遁席寶田督飭全隊併力攻城賊眾膽落奪門逃遁我軍四面截擊斬馘數百名立將城池收復查席寶田謀勇兼資軍民愛戴疾馳數百里冒雨血戰迅復堅城厥功甚偉應如何獎勵之處伏候 聖裁其所部將士奮勇爭先可否懇恩

准臣擇尤請獎陣亡都司金國泰前因疊克堅城擬保副將合無
仰懇飭部照副將例從優議卹並加恩予諡擬保千總張青連等
均請飭部從優議卹又奏沛逆一股自初九日敗後知撫州不可
犯頭股潛趨建昌臬司劉于潯飭飛划營進援十二日駛至萬年
橋沿途與衝鋒營在石門擊賊各有斬獲衛民軍亦擊賊於金竺
山各營兵勇悉爲響應與飛划營分護橋道十三日賊匪分股繞
越上游一股從城南之石頭港口擄民船數十搶渡一股從城東
之圭峯渡拆毀民屋搭造浮橋一股仍攻萬年橋使我應接不暇
守備楊錦斌以衛民軍馳至港口賊過西岸已數百人官軍排槍
環擊斃賊百餘名餘賊倉皇上船我軍追擊賊棄船鳧水遁去淹
斃無數各勇卽用賊船徑渡追至十里山又擒斬數十人其圭峯
渡浮橋經官兵盡數焚毀攻萬年橋之賊亦經擊退斃賊數十名

十四日賊瞰我軍分扼上游各渡遂全力攻撲萬年橋卡勇潰退楊錦斌聞信馳至賊過橋者已數千人洋槍雨集楊錦斌分三路接戰王耀亮戰船亦飛槳直下水陸各勇苦戰逾時斃賊數百扼橋而守楊錦斌以流星鎚擊斃紅衣賊目一名羣逆大潰遁入山谷其僞王宗一股尙踞白港蔓延瀘溪卽席寶田痛勦於規橋頭者也十五日席寶田與劉勝祥分路進剿該逆翻山而遁見計建郡可以無虞惟該逆將越新城而西臣已檄令總兵普承忠由宜黃進至廣昌南豐相機扼守飭席寶田督軍分道緊追使該逆無可駐足又奏據席寶田稟稱疊訊賊供句容金壇宜興之賊未動溧陽股匪實已悉數上犯侍逆後路僅畱四僞練王入江者前股爲幼沛王譚逆所統次股爲僞王宗諸李等逆所統合計眾近十萬幸侍逆未至心志不齊江省兵力漸集大局不至決裂惟是賊

眾且悍若不速就殄滅鋌而四散福建廣東湖南必將受其流毒等情除已飛咨各鄰省趕緊堵禦外應請旨飭下福建廣東湖南各督撫臣迅飭地方文武合力嚴防以杜竄越而保全局 上諭

此股髮逆竄陷金谿原欲踞爲巢穴以待待逆之來經席寶田攻克後該逆知撫郡不可犯遂潛趨建昌復被劉于潯等率水陸各勇進援賊不得逞遁入山谷中其僞王宗一股亦由白港翻山而遁此時建郡諒可無虞但逆眾尙未殄除豕突狼奔則廣昌南豐等縣在在可虞著沈葆楨嚴飭派出之普承忠督率兵勇由宜黃相機前進迎頭截擊並飛飭席寶田等緊蹙賊蹤以收前後夾擊之效僞王宗一股尙踞白港蔓延潭溪經席寶田與劉勝祥分路進剿該逆將越新城而西逼近閩境著左宗棠徐宗幹仍遵前旨調派得力弁兵嚴密堵剿俾免蔓延貽患溧陽業經克復該匪悉

數上竄合計眾近十萬據沈葆楨奏見因侍逆未至心志難齊江
省兵力漸集大局不至決裂惟鋌而四散則福建廣東湖南恐將
受其流毒所籌不爲無見著毛鴻賓郭嵩燾惲世臨分飭所屬豫
籌防剿以備不虞張運蘭一軍計已啟行赴閩左宗棠等務當酌
度緩急調派該臬司扼要嚴防劉典所募之勇應已成軍著惲世
臨催其由江前進遏截該匪西竄之路於江楚軍務兩有裨益本
日據富明阿奏福山陽舍復被忠逆竄擾圖鈔李鴻章後路已飭
該撫迅派勁旅力遏兇鋒曾國藩前奏溧陽已克楚澗各軍業已
聯絡一氣卽著飭令鮑超等規取廣德以分賊勢侍逆如有上竄
信息該大臣尤當分飭皖南諸營沿途堵截斷不可令其竄入江
境左宗棠仍當扼守徽嚴各隘口俾該匪不能接續南竄則竄江
之匪自不難剋期撲滅將此由六百里各諭令知之○諭多隆阿

奏攻拔整屋外城受傷請假並靈臺境內已無賊蹤又奏攻克整屋並傷重調治各摺片雷正綰奏汧麟等處剿賊獲勝情形劉蓉奏收復西鄉賊勢全數東竄見籌布置防剿情形各一摺整屋城小而堅米糧頗足藍逆以積年巨憨拌死負嵎多隆阿督率兵勇晝夜圍攻奮不顧身竟將堅城攻拔具見忠勇過人惟該大臣頭眩俱受槍子尙未取出曷勝廑繫本日已賞假調理並由內府發去如意拔毒散四料以資敷治所請伊子雙全赴營隨侍一節已寄諭黑龍江將軍令其傳知雙全赴營隨侍並因道途遙遠命其馳驛赴陝藉資迅速該大臣務當體朝廷眷注之意安心靜攝加意調治以慰馳廑多隆阿或在營調養或因醫藥較便須赴西安省城均著自行斟酌辦理其欽差大臣關防准其交穆圖善暫行護理督辦軍務卽督令將整屋餘匪悉數追捕毋畱餘孽至首逆

藍大順是否殲斃抑或乘間逸出並著查明具奏雷正綰回軍靈
臺截剿汧麟竄逆攻破上梁鎮逆巢曹克忠一軍復將雨亭寺花
花廟一帶賊巢全行平毀靈臺界內已無賊蹤雷正綰當乘此聲
威亟將崇信一帶餘匪肅清會合曹克忠及陶茂林隴州之師殄
除羣醜以期迅速赴甘規取平固西鄉收復業由李雲麟奏到此
次劉蓉所奏情形大略相同此股髮逆因回援金陵一入東竄而
僞天將馬仕榮尙在安康北境游弋藍逆二順又由鄖西竄及洵
陽之蜀河難保不意圖回窵劉蓉擬畱蕭慶高何勝必兩軍駐紮
興安所籌係爲川陝兩省門戶起見著駱秉章卽飭令蕭慶高等
實力扼紮相機防剿劉嶽昭所部九營見已回蜀並著駱秉章會
同賈洪詔妥籌調遣劉蓉新募楚勇三千人已抵萬縣該撫見令
徑趨商州扼要堵剿著照所議辦理惟此項楚勇由萬赴商正可

攔腰截賊不可徒成尾追之勢且須兼顧鄖防不可稍分畛域整
屋見已收復劉蓉所派知縣黃鼎等五營或先赴商州扼堵或令
東趨追躡並著劉蓉多隆阿妥商調派昨據張之萬奏髮逆已竄
內鄉等處是楚豫兩省防剿萬緊前已疊諭劉蓉令其東下追賊
以收夾擊之效該撫擬欲進省接篆固爲整頓起見惟賊匪未受
大創若無大員總統進剿恐致復形鬆勁又將回竄陝疆况徽縣
兩當賊氛未淨洵陽一帶業有回竄之虞該撫曾否派兵妥籌堵
剿其漢南防務布置是否周密以上各節均應悉心區畫如該撫
已赴西安卽著將應辦事宜迅速籌畫仍察看賊勢軍情出省督
兵毋稍延緩李雲麟扼守興安何以任賊東趨不思扼擊著懷遵
前旨妥籌會剿毋稍疏虞將此由六百里各諭令知之○諭多隆
阿奏請飭令伊子來營隨侍等語多隆阿見在攻克陝西整屋縣

城頭面受傷醫藥一切所在需人伊子齊齊哈爾城披甲雙全著特普欽飭令迅赴陝西多隆阿軍營以便隨時調養並著加恩准其馳驛前往將此由五百里諭令知之○予浙江陣亡總兵官何安泰祭葬世職建祠陝西陣亡總兵官桂學高江西陣亡副將金國泰浙江陣亡副將郭興發江蘇陣亡副將劉起等祭葬世職○癸卯李鴻章奏前任江蘇巡撫徐有壬於咸豐十年四月閒賊逼蘇城力籌守禦嗣因逆眾膺至省垣失陷正在督隊迎剿賊已直撲內署力不能禦被刀刺帽將墜尙手自整冠抗聲大罵立時遇害其族弟工部主事徐曾庚幕友候選理問鮑鄂銜家人楊安同時被戕次子候選郎中徐震翼投池水死妾施氏女淀姑均自縊僕婦劉氏裴氏亦俱焚死當經前兩江總督何桂清等奏明奉旨分別旌卹今蘇城克復其長子同知徐震耀赴蘇尋求遺骨備棺

重殮臣查徐有壬由進士部曹外擢道員洊升藩臬兩司旋陞授

江蘇巡撫服官數省皆有政聲爲人嚴厲自持有爲有守當江南軍潰丹陽繼陷常州棄逃人力無可挽回惟有一死自靖無愧封疆守土之義且闔署相從殉難忠孝節烈正氣猶存合無仰懇

天恩准於蘇州建立專祠其同時殉難之家屬幕友人等一併附祀以彰忠藎並宣付史館立傳出自鴻慈再徐有壬僅二子次

子震翼從死撫署長子正三品廕生候選同知徐震燿當時畱籍辦理團防未及於難今得爲有壬收骨孤露餘生亦堪憫惻上

諭內閣前任江蘇巡撫徐有壬於咸豐十年四月在蘇州省城殉難當經奉旨照巡撫例賜卹並加恩予諡家屬幕友均交部分別旌卹茲據李鴻章奏稱該故員服官數省所至皆有政聲在江蘇巡撫任內臨難捐軀無愧封疆守土之義徐有壬著再加恩准其

於蘇州省城建立專祠其同時殉難之家屬幕友人等一併附祀以彰忠藎其平生事蹟並著宣付史館立傳伊子正三品廕生候選同知徐震燿著吏部帶領引見○賞已革按察使孫治六品頂帶隨副都統文煜赴甘肅糧臺差委○甲辰以畿輔馬賊肆擾申諭順天府直隸總督嚴緝○乙巳諭議政王軍機大臣等前因多隆阿於攻拔盩厔縣城時頭面受有槍傷賞假一箇月安心調理見在該大臣受傷處所槍子是否業已取出傷口調理能否漸就痊愈朝廷甚深懸繫如槍子業已取出卽著飛速奏聞以慰廑念藍逆是否已在誅數如由盩厔竄出卽著多隆阿傳諭穆圖善派兵嚴拏勿任漏網將此由五百里諭令知之○諭前據沈葆楨奏僞王宗一股將越新城而西逼近閩疆諭令左宗棠徐宗幹派兵嚴密堵剿茲據徐宗幹奏建甯府屬接壤江西浙江逆匪意圖竄

越閩疆防務喫緊見飭署總兵袁良帶兵四百名馳赴浦城調金門鎮標等營兵五百名俟蔡潤澤巡洋回省督帶繼進派知府張文斌募勇數百併交袁良調遣並以閩浙交界關隘甚多委候補道張啟煊馳往建甯會剿等語賊匪因江浙兩省不得逞志圖竄閩境以遂其遠遁之謀且此股竄賊人數甚眾閩省與江浙江西毗連處所甚多徐宗幹派出之兵恐兵力尙形單薄張文斌所募壯勇倉卒湊集未必卽能得力著左宗棠徐宗幹懷遵疊次寄諭於江浙江西接壤福建地方嚴密堵禦如兵力尙屬不敷應如何添派勁旅擇地扼守以期穩固之處並著妥籌辦理前諭左宗棠等將曾元福所部兵勇由臺灣撤回派赴邵武一帶著卽飛檄曾元福飭令星速前進擇要駐紮以厚兵力該督撫務當慎益加慎布置周密毋令該逆闖入閩疆致全局又形掣動張運蘭一軍當

已在途著左宗棠徐宗幹飛催該臬司趕緊趨行迅回閩省以資
攻剿丁曰健已赴臺灣道本任見在內山四塊厝北投海口小埔
心林晟洪機陳啞狗等匪巢未破曾元福一軍如尙未啟程卽著
催令迅速內渡丁曰健卽與林文察曾玉明等會商分督兵勇前
往搜捕毋畱餘孽丁曰健見回府城如有應須親出彈壓督剿之
處仍著隨時親往毋得安居府城致令首惡稽誅復行滋蔓該道
所籌善後各事宜務當認真籌辦不得有名無實將此由六百里
諭知左宗棠徐宗幹並傳諭丁曰健知之○廣江西萍鄉縣學額
三名○丙午僧格林沁奏擒匪張總愚一股盤踞南召一帶倚山
負固臣前派提督傅振邦督帶步隊前往會剿頃聞賊匪向西北
山中竄至嵩縣屬之龍王廟地方有奔黑峪欒川之信該處係亂
山之中馬隊不能進擊翼長蘇克金見移駐魯山嵩縣一帶堵禦

又據探報髮逆於二月初十一等日竄至西坪地方該處係入西峽口大道並有水路之賊自漢中沿江直下若過鄖陽指日可到老河口是鄖州新野亦屬喫緊捻匪陳大禧一股又於十三日竄至襄陽所屬之榆山一帶欲向樊城老河口奔竄而髮逆又復東來難保不勾結爲患查皖境已就肅清臣原擬俟撫臣喬松年到皖將善後事宜面爲籌商後再行統軍赴豫該撫臣見尙未到臣祇得先其所急於二月二十六日分撥馬隊啟程作爲頭起臣卽帶領後起馬隊赴豫先至許州一帶相機探勦儻該逆仍踞山谷惟有派撥步隊進攻令馬隊紮於許州以南平闊地方俟誘其出山方可鈔擊惟臣營步隊兵勇不敷調遣已於皖省投誠勇丁內選擇一千名帶豫隨勦會國藩奏金陵首逆並未出城猛撲僅於水西旱西兩門放出老幼婦女萬餘人爲節省米糧之計會國

荃亦悉心布置杜其衝突鮑超東壩之師久無戰事臣當檄令分營進取句容丹陽一帶如克復句容卽以全軍駐守專防金陵城破後冒死外竄之賊不令貽患他省廣德州踞匪亦以糧盡棄城遁歸湖州目下湖州羣匪磨集皆思上犯江西以覓生路幸左宗棠派軍扼防瀘安遂安華埠等處甚爲周密臣亦嚴飭徽甯各防聯絡要擊其業經內竄江西者二月初九日席寶田馳勦金谿獲勝十一日收復縣城賊乃由瀘溪潛向建昌十二三四等日該郡水陸防軍在萬年橋等處三戰三捷十六日楊錦斌於郡南小挫一次韓進春於郡東獲勝一次十八日賊撲附城各營席寶田會同韓進春等軍併力迎勦賊眾大敗有此一捷當可保全腹地完善之區沈葆楨又添調繼果營一軍回顧撫建或可驅除出境惟據席寶田稟稱撫建股匪人數實有八九萬眾未可輕視應請旨

飭下閩粵兩湖一體嚴防免致變成流寇又煩兵力前奉諭旨飭派楊岳斌戰船數百號駛赴鄱陽湖並將江忠義舊部歸其統帶查刻下賊由建昌退聚兜港近偪南豐在鄱湖之南五百里江忠義舊部精捷一軍駐守婺源新建等處又在鄱湖之北四百里均非水師所能兼顧江西水師有劉于溥孫昌國二軍儘數分布而精捷一軍業經奏調江忠朝統帶據報啟程來江亦未便另派大員兼統是楊岳斌師船駛至上游無裨於江西防務似不若仍紮金陵江面尚可斷接濟而防竄越 上諭議政王軍機大臣等張總愚竄至嵩縣屬之龍王廟有奔黑峪欒川之信髮逆竄至西坪並有水陸之賊自漢中沿江直下鄧州新野亦屬喫緊陳大澐一股竄至襄陽所屬之榆山一帶欲向樊城老河口奔竄僧格林沁恐各匪勾結爲患已親統全軍赴豫先至許州一帶探剿所籌深

合機宜著卽督同蘇克金傅振邦等誘賊出險先將此股殄滅以次削平羣寇張之萬督飭地方文武團練協同剿辦均聽候僧格林沁調遣糧餉軍火隨時籌濟不得遲誤漢中賊匪沿江而下較旱路尤爲剽疾若過鄖陽指日可到老河口鄧州新野均屬緊要張之萬當抽撥兵勇赴防無任闌入句合爲患此股竄賊既有竄過鄖陽可到老河口之說而陳大澐一股亦欲由樊城老河口奔竄是楚北防務十分喫重何以近日未據官文等續報情形著官文嚴樹森飭令在防將士晝夜防範儻兵力尙有不敷應卽相機籌調樊城一帶儻須水師防剿亦應一併籌派不可稍有疏虞沈桂芬因張總愚有分股竄河洛之謠已調兵赴防曲襄洪陽等渡口如匪蹤逼近卽令和昌等隔河堵擊各口渡船嚴飭一律提歸北岸並著張之萬張集馨通飭所屬照辦以免奸匪搶船北渡漢

南髮逆東竄恐因豫省有大軍堵截避兵而行或竄晉或回陝俱在意中沈桂芬仍當認真設防劉蓉李雲麟務當派兵出境會剿不得以驅賊出境遂謂可以卸責李雲麟前奏調澄漢九營水師防河何以此股賊匪沿江而下直犯鄖陽窺伺老河口足見水師不能得力著卽統率所部盡力追剿毋得區別畛域貽患鄰封多隆阿傷痕會否就痊整屋餘匪應已掃除淨盡潼關等處防務至要該將軍當與劉蓉張集馨咨商分兵籌防以期有備無患劉蓉派援整屋之五營亦可另行改撥分防要口該撫仍當懷遵前旨察看軍情賊勢剋日出省督剿以資得力曾國藩奏鮑超東壩之師久無戰事檄令分營進取句容丹陽一帶如復句容卽以全軍駐紮專防金陵城賊冒死外竄所籌亦甚周密惟東壩爲江浙門戶見在廣德踞匪歸併湖州皆思上犯江西沈葆楨設防嚴密該

逆計無復之難保不曰竄廣德由東壩圖援金陵均不可不慮鮑超一軍自當力保東壩方能進取見在廣德已經收復應卽派兵駐守以防復踞該大臣請飭閩粵兩湖一體嚴防免成流寇前已諭令毛鴻賓惲世臨徐宗幹等嚴密偵探堵禦著官文嚴樹森一體豫爲防範以免疏虞江忠朝業已啟程楊岳斌水師卽著毋庸上駛仍飭於江面嚴斷濟賊之路金陵城大而堅圍攻不易曾國藩能否親往督辦俾各營將士有所稟承以期迅速奏功並著酌度辦理將此由六百里諭知僧格林沁官文曾國藩多隆阿嚴樹森張之萬沈桂芬劉蓉李雲麟並傳諭張集馨知之○諭本日據曾國藩奏鮑超東壩之師久無戰事檄令分營進取句容丹陽等語前據富明阿奏丹句二城非厚集兵力不能節節掃蕩已派詹啟綸帶兵前赴鎮營與馮子材等會議並函商馮子材等加派熟

識路徑諳練賊情之大員妥籌會剿是揚防鎮江之師亦以規復丹句爲己任見在鮑超一軍業已分營進取正宜乘機兜剿以期迅拔堅城著富明阿馮子材魁玉速派得力將弁各率所部兵勇或進攻句容會同鮑超兩面夾擊或分攻丹陽俾賊匪有所牽掣不能與句容之賊聯絡救援則剿辦亦易得手富明阿馮子材等務當酌量情形相機妥辦仍一面將城防江防各事宜布置妥協穩固再圖進取毋稍掉以輕心將此由六百里各諭令知之○諭僧格林沁奏密陳李世忠遣散部勇情形豫籌控制一摺會國藩奏接准李世忠來函請俟五城勇散後開缺引退等語李世忠因皖北肅清先將天長五河兩城交出歸地方官妥辦善後並將五河兵勇三千名一律遣散其滁全來各城亦擬於三月底全數移出遣散練兵如果言行相符消患無形固屬妥善第據僧格林沁

奏查覆所稟雖屬馴順而語多剖辯心猶未平曾國藩亦有該提督平日攬權專利詭詐多端之語是其畏罪輸誠未可盡信且其部下人數眾多一朝盡行撤遣難保不遲疑畏沮滋生事端僧格林沁見擬飭陳國瑞全軍駐紮徐州藉資控制所辦甚是該大臣已赴豫省督剿所有一切撫綏駕馭機宜著曾國藩喬松年會商妥辦五城兵勇屆期能否遣散李世忠屆期是否前赴安慶軍營該提督果能自實其言輸忱效順卽照曾國藩所擬辦理儻陽奉陰違潛圖反側亦不得謂事所必無僧格林沁曾國藩喬松年亦當悉心籌畫先事防維不可稍涉大意喬松年日內計已自安慶赴任卽著照該撫前奏迅速馳赴臨淮駐於營中以資鎮撫將此由六百里各密諭知之○丁未諭議政王軍機大臣等曾元福奏肅清嘉義克復斗六林文察奏擒獲首逆內山肅清各一摺嘉義

縣境各逆莊經曾元福督兵攻破並將附近斗六各逆莊及斗六土城陸續攻拔其內山四塊唐林逆老巢亦經林文察督軍攻克生擒首逆林賴展正法臺灣軍務漸次肅清嗣後於出力人員請獎之件著丁曰健等查明歸左宗棠徐宗幹彙覈具奏以免互相歧誤曾玉明攻破北勢涌賊巢首逆洪欉逃往埔裏社一帶陳啞狗弄堅踞小埔心著丁曰健卽會同林文察曾玉明迅拔賊巢將首逆斬擒並將在逃餘匪搜捕淨盡毋畱餘孽本日林文察報內於林文明一員因係林文察胞弟未經請獎該員應得獎敘著左宗棠徐宗幹查明具奏臺事悉平之後所有督剿之林文察等應如何獎敘之處及攻剿情形並著左宗棠徐宗幹查明彙奏見在髮逆由江西分竄閩疆防堵正形喫緊曾元福一軍仍著左宗棠徐宗幹遵奉前旨迅速檄飭內渡以資防剿毋稍遲延將此由六

百里諭知左宗棠徐宗幹並傳諭丁曰健知之○己酉諭內閣賈洪詔奏滇省歷年軍務徇私濫保輕褻名器請飭一律更正一摺軍興以來各直省保舉軍營打仗出力收復城池實在著有勞績者一經奏到無不立沛恩施以昭激勸乃據賈洪詔奏徐之銘在滇奏報戰功無非任意鋪張以爲保舉地步其所保之人有並未到營並未入滇而得邀獎敘者至賞給功牌五品以上卽應奏明給獎而該撫等竟有賞給功牌至二三品者其司道府及武職等官亦公然以四五品功牌充賞該撫濫賞二品頂帶不下百餘人甚至與臺賤役無不濫膺頂帶尊卑等級蕩然無存疊據自滇來川官紳眾口僉同姓名確鑿實難枚舉等語朝廷名器以待有功徐之銘在滇竟敢以國家賞功之典爲該撫市恩之具等威凌替廝役混淆壞法亂紀至於斯極不但開僭濫之門啟僥倖之漸卽

該省實在出力著有勞績人員亦無以自別軍心士氣何由而振
見在徐之銘業經革職飭令來京聽候治罪該撫前後所保文武
各員卽著該部槩行一律註銷其有實在立功者仍准勞崇光賈
洪詔於抵滇後查明覈實保奏以示區別至該省各督撫所賞功
牌除六品以下仍准戴用外所有擅賞之二品至五品功牌並文
武各員擅賞功牌均著一併革去以重名器而肅官方嗣後滇省
人員惟當爭自濯磨仰副朝廷維新之治於勞崇光賈洪詔到滇
後振刷精神力圖報效無得沾染舊習自蹈愆尤朝廷論功行賞
仍當覈實加恩不至沒其實在勞績也○李鴻章奏官軍攻克嘉
興府城前經臣將大略情形奏報見據程學啟等縷晰呈稱我軍
自附城偪紮後偽榮王廖發受僞挺王劉得功率眾數萬死守復
句結湖州悍逆黃汶金卽黃老虎四出竄撲二月十五六等日程

學啟與李朝斌等飭水陸各軍四面分攻於沿城河邊添築月牆數座各軍自此環攻晝夜不息十七日程學啟自率親兵用開花大礮擊毀城頭礮臺二十餘座轟塌城垣百餘丈賊仍負土掩塞更番死抗十八日湖州黃逆陡率大股萬餘由新塍直撲我軍後路程學啟攻城正急分飭張家瑜等督師擊走之城上賊漸不支程學啟嚴催各軍豎梯登北門城悍賊湧至抵禦我軍多有傷亡程學啟憤極自督親兵躍過浮橋飛登當被洋槍打入左太陽偏後昏暈撲地劉士奇王永勝等急率隊以木筏分渡直抵西北兩門陳有昇等均被槍傷裹創奮進適礮轟燒城中火藥房賊眾駭亂劉秉璋潘鼎新各率所部乘勢越過城濠搶入東門甕城李朝斌亦抽水師登岸由南門踰牆而進榮逆猶率兩廣老賊數千人巷戰各軍奮勇擊殺斬首五千餘級餘賊思由西門出遁經陳有

昇等與李朝斌水師攔擊分投截殺城內悍逆悉就擒誅僞挺王
劉得功爲礮轟斃僞榮王廖發受逃匿井中接出訊明梟示遂於
十八日申刻克復嘉興府城二十一日劉士奇等復將黃老虎援
逆屯踞新塍四亭子一帶賊卡賊壘踏平該逆全數遁回湖州查
嘉興府爲東南財賦之區城堅池深糧多賊悍榮逆等聚眾死守
又恃有湖逆黃老虎外援使我軍腹背受敵程學啟自埽平東北
門外堅壘多厓一面分剿援賊一面率眾環攻誓死必克始得迅
拔堅城盡殲悍黨從此蘇滬之防漸固而杭逆糧路已絕羽翼益
孤於大局似有裨益程學啟出奇制勝忠勇謀略實過尋常編修
劉秉璋身先士卒堅忍耐苦該二員臣未敢擅擬應請旨優加獎
勵署江南提督總兵李朝斌常鎮通海道潘鼎新均擬請旨交部
從優議敘沈葆楨奏窺伺建昌賊匪經官軍擊敗後潛踞城東二

十里之小嶺韓進春偕建昌兵勇追勦至洪門山賊遁踞黃源村
乘夜由硝石上游渡河繞竄新豐上塘等處十七日賊偪城南經
韓進春擊退十八日該逆悉銳三萬餘人犯精毅營席寶田令各
營散伏左右密約韓進春等分路擣虛該逆先犯中前後三營四
面伏起縱橫盪決殺賊二千有奇該逆猶折回猛撲韓進春等已
將賊館節節掃蕩旁鈔而出賊大驚潰追奔四十里十九日韓進
春進紮上湖營壘甫定賊乘夜涉河撲營復被我軍擊退二十日
賊竄兜港去建城九十里蔓延於新城南豐各鄉前旗已入廣昌
界訊據賊供該逆注意撫建今屢撼不動思由甯都窺贛州署贛
南道蔡應嵩等已添招勁勇布置城守席寶田統率劉勝祥等營
向南豐留韓進春於上湖以杜回竄 上諭議政王軍機大臣等
杭州省城據奏探報業經浙軍攻克想左宗棠必已奏報在途所

有石門縣及湖州踞賊自必膽寒浙師可以乘勝攻取李鴻章暫
令劉秉璋畱守嘉興潘鼎新分守海鹽乍浦平湖各城其前由常
州丹陽竄抵江陰常熟股匪經郭松林等兜剿斷其歸路而賊尙
有二三萬眾屯踞楊厰一帶李鴻章卽飭提督劉士奇等代統程
學啟所部會同郭松林等之軍奮力進剿務將楊厰等處股匪迅
卽掃蕩乘勝會攻常州並著左宗棠將攻克杭州及布置各情迅
速奏聞仍督飭浙軍進克石門分兵替防嘉興海鹽等城以便李
鴻章所部各軍併力剿辦蘇境之賊並蘇浙諸軍合力以取湖州
漸次肅清蘇浙地方以慰廬望前由皖省竄入江西之賊窺伺建
昌府城疊經韓進春及席寶田等軍剿殺甚多賊遁兜港蔓延於
新城南豐各鄉前旗已入廣昌地界據沈葆楨奏獲賊供賊不得
逞於撫建思由甯都以窺贛州著沈葆楨督飭署贛南道蔡應嵩

等將城守嚴密布置以資捍禦並飭席寶田所統各軍跟蹤追剿總期就地翦除方爲善策韓進春畱於上湖嚴防回竄曾國藩於蘇浙兩省軍情均應妥籌兼顧能否親赴金陵督辦攻剿以期迅克老巢仍遵前旨自行酌奪辦理程學啟受傷曾否就痊據李鴻章奏稱所傷極重服藥已有轉機仍著飭令妥爲調理一經痊愈隨時奏聞戈登前由溧陽進攻金壇散受槍傷並著李鴻章存問慰勞諭令休息俟傷痊再圖協剿以期得力將此由六百里各諭令知之○諭多隆阿奏攻克盤屋詳細情形並漢南髮逆下竄各摺片該大臣於圍攻盤屋時受傷甚重此次摺內未據提及朝廷廑繫殊深見在槍子是否取出傷病曾否漸痊該大臣已否回省就醫均著迅速馳奏並一面安心調攝以慰馳廑盤屋旣復藍大順巨逆是否殲斃抑係脫逃並著飭令穆圖善等將該逆下落查

明及盤厓餘匪一併認真搜捕毋令漏網漢南髮逆下竄前隊已入豫境擾及內鄉屬之巡檢司等處後隊仍在龍駒寨一帶南陽情形喫緊該大臣見飭藍斯明扼紮商州飭劉漢秀等扼守潼關以防西竄所籌尙屬周妥此股賊勢甚剽疾並有水路之賊自漢中沿江直下以犯鄖陽劉蓉李雲麟當懷遵前旨督軍痛剿越境窮追並會合多隆阿一體分兵嚴行截擊與楚豫官軍聯絡夾剿痛殄逆氛毋得以驅賊出境爲了事僧格林沁督軍赴豫業已啟程豫省張逆及東竄髮逆尤恐被剿回竄商雒一帶多隆阿當飭各員認真防剿毋稍大意陶茂林進剿隴州回匪連獲全勝與雷正綰定期夾剿卽著飭令一鼓殲除肅清陝境以便進兵甘省規復平固毋得遲延將此由六百里各諭令知之○諭賈洪詔奏籌辦滇省事宜俟漢南防軍凱撤再行舉辦並昭東防回情形一摺

雲南軍務以昭東二府爲進兵門戶昭通自更換鎮府後回匪仍前滋事該鎮撫聯絡紳團同心禦侮東川一帶由楊盛宗與回和好頗可相安賈洪詔擬俟川省陝防凱撤卽親統大軍由昭通進兵分別勦撫所籌尙屬妥協見在漢中髮逆全股東竄劉嶽昭所部九營已由劉蓉飭令回川唐友耕見在南川勦匪亦由駱秉章派員前往接替滇省進勦機宜正可妥籌舉辦該二員或統所帶舊部或尙須增募兵勇卽著駱秉章賈洪詔會商妥籌此時滇省進兵總以兵多餉足一鼓蕩平不至另生枝節爲要儻或稍失機宜一有挫失反爲回逆所輕勦辦更形棘手駱秉章賈洪詔務宜謀定後動計出萬全固不可濡滯稽延亦不容冒昧失機是爲至要岑毓英所稟克復楚雄情形並著賈洪詔確查具奏其幫辦池南道夏家疇等旣據該撫奏稱勇於任事素不附回見克他卽鎮

沅等廳城甚爲得力卽著飭令上緊攻克思普城池以清邊圉賈
洪詔另摺奏徐之銘歷年徇私濫保文武各員請飭部一概註銷
一摺本日已明降諭旨照所請辦理矣但此時滇省尙未進兵若
遽將此旨宣示殊恐其失職失望或愈堅其附回之心甚至造言
惑眾致成固結不解之勢殊於滇事關係非輕此旨著發交賈洪
詔收存何時可以宣布著相機妥爲辦理仍一面於宣布後具奏
以便補行發鈔將此由六百里各諭令知之○諭滿慶恩慶奏買
巴扎倉喇嘛搶去已革待審之總堪布照繕夷匪搶去摺件呈覽
改委陳埴暫署拉里糧務請飭催議補僧俗番目並催四川餉項
各摺片據稱二年八月十一夜已革總堪布羅布藏稱勒拉木結
帶喇嘛數百名脫逃經官兵拏獲同逃之喇嘛洛桑曲札據供羅
布藏稱勒拉木結由色拉寺行抵噶納山有喇嘛二人將該已革

總堪布從馬上抱放平地餘眾及羸馬概令前行惟吐多卜降巴等十餘人在彼耽延多時將該已革總堪布之騎馬空牽至噶納山打尖云羅布藏稱勒拉木結行至山頂已死又碩第巴等報稱十八日在噶納山東北尋見石板圍圉有羅布藏稱勒拉木結屍身兀坐其中見將屍身搬回當經派員查驗棺殮寄埋旋經官兵在達木屬畢納地方追般逃犯沙克嘉盡巴等六十七名生擒吐多卜降巴等一百六十五名押解回藏查明首從照夷例懲治等語色拉寺見已將不法喇嘛交出呈繳軍械其寺中誤受拖累之領袖及眾僧均在神前盟誓具結永遠不敢妄爲卽著滿慶恩慶迎機開導妥爲彈壓毋令再滋事端福濟景紋務當星速啟程前進不得任意遷延致干咎戾前被夷匪搶去之滿慶等摺件業已照繕呈覽所有遺失佛匣著滿慶等飭知班禪額爾德尼毋庸補

具拉里糧務嚴清榮撤任後經滿慶等札委巴塘糧務張啟昌署理該員因巴塘事件尙難交卸一時未能前赴署任著駱秉章迅速選賢能之員前往接管拉里糧務其未到任以前卽照滿慶等所請准其以卸任察木多糧務陳埝暫行署理總理商上事務各員兄在止有噶布倫白瑪結布一人係實授之缺其餘均屬署任據滿慶等奏呼應不靈深恐別滋事端請飭催議補僧俗番目等語自係實在情形著福濟景紋於到藏後迅速辦理將此由六百里各諭令知之○諭滿慶恩慶奏買巴札倉喇嘛搶去已革待審之總堪布改委陳埝暫署拉里糧務請飭催議補僧俗番目各摺滿慶等所奏該已革總堪布身死情節甚屬含糊支離難保非被人謀害斃命滿慶等捏詞入告亟應徹底根究以期水落石出著崇實駱秉章福濟景紋將羅布藏稱勒拉木結身死情形嚴密訪查

據實具奏其所稱生擒吐多卜降巴等並色拉寺之領袖僧眾具結永遠不敢妄爲亦未必盡皆確實並著一併查奏滿慶等奏請飭呼徵呼圖克圖及隨伊犯眾仍遞解回藏以便將兩造互相訊究萬無如此辦法並著該將軍等仍遵本年正月初三二月十四等日密諭妥爲辦理福濟景紋務當星速啟程前進以弭藏中禍患寄諭嚴催業已至再至三毋再遷延推諉至于咎戾滿慶等前將拉里糧務嚴清榮撤回札委巴塘糧務張啟昌署理該員因巴塘事件尙難交卸見在改委已經交卸之察木多糧務陳埴署理已照滿慶等所請准以陳埴暫署仍著駱秉章迅選賢能之員前往接管以重責守據滿慶等奏稱見在止有噶布倫白瑪結布一人係實授之缺其餘均屬署任呼應不靈請飭催議補僧俗番目等語著福濟景紋酌量情形或懷遵前旨於到藏後查明覈辦或

權衡緩急豫行揀補均著妥籌辦理藏地餉項萬分支絀本日滿慶等奏請撥餉已於另行寄諭內催令該督籌撥惟此項餉銀可否撥給應否解交滿慶恩慶扣由福濟等赴藏時帶往著駱秉章斟酌情形妥爲辦理將此由六百里各諭令知之○予陝西陣亡協領穆騰額浙江陣亡參將趙三德等祭葬世職○庚戌諭議政王軍機大臣等訥欽奏馳抵榆林整隊前進一摺甯夏滿城被圍日久亟待援兵訥欽見雖馳抵榆林俟至定邊探蹤進剿惟定邊渡河三十里卽是靈州該處回匪眾至數萬逆首馬化澂賊巢卽在金積堡靈州附近四面俱爲回逆占踞非攻破靈州不能進援甯夏訥欽見擬派副將趙延烺作爲嚮導直指靈城設法攻剿所辦尙合機宜卽著督率在事將弁實力進攻並於勇往之中加以慎重毋致輕進失利第訥欽原帶兵二千名續調直晉兵各一千

爲數無多未經戰陣恐難深恃該署提督前次奏撥馬隊五百名
業據多隆阿以無可抽撥覆奏此時盤厓業已攻克漢南髮逆全
股東竄陝省防務漸鬆自可酌撥馬隊前赴訥欽軍營會剿以厚
兵力著多隆阿妥籌調撥毋分畛域陝省回匪自多隆阿督兵痛
剿次第削平其汧隴餘氛有曹克忠等軍分兵掃蕩不難剋日蕆
事而甘肅自回匪起事後地方官狃於議撫遂至賊氛日熾到處
蔓延若非威望素著之大臣統兵進剿大張撻伐不足以掃羣醜
而靖邊陲本日已明降諭旨命多隆阿督辦陝甘軍務矣該大臣
務當統籌兼顧俾陝甘兩省迅就肅清用副委任訥欽所部各軍
並陝甘帶兵各員均歸多隆阿節制以一事權訥欽見督兵進攻
靈州其雷正綰一軍應由何路進取會合攻剿之處著多隆阿酌
量調派訥欽所部恐無得力之將多隆阿如能揀派數員前往於

大局必更有益多隆阿傷病近日是否漸就痊愈日深塵繁劉蓉計已抵省陝西防剿事宜該撫所部各營足敷分布著隨時與多隆阿妥籌辦理多隆阿馬隊分撥訥欽後如兵力不敷卽著劉蓉將所部之兵分撥多隆阿若干以資助剿訥欽摺內所稱續調晉兵千名口糧應否仍照晉省防兵之例支發抑照直隸征兵口糧給支並趙延烺所統兵勇三千月餉應由何省籌撥之處請旨遵行等語著戶部妥速議奏將此由六百里各諭令知之○命欽差大臣西安將軍多隆阿督辦陝西甘肅兩省軍務○辛亥諭議政王軍機大臣等富明阿奏添撥馬步兵勇渡江分路進取丹陽並嚴防江面及籌濟北渡難民一摺另片奏丹陽城外接仗情形等語前因會國藩奏檄令鮑超移東壩之師進取句容丹陽一帶當經諭令富明阿馮子材等派兵會剿見在富明阿添派馬步隊渡

江分路進取詹啟綸帶領馬隊由辛豐直抵丹陽北門外頗有斬獲然必須南北兩路會同攻擊剿辦較易得手鮑超一軍曾否進攻句容抑或先取丹陽著曾國藩酌量調派務與鎮防各營聯絡聲勢迅速奏功如鮑超進偏句容兼防金陵城賊外竄卽著富明阿馮子材等督率諸軍察看丹陽地勢合力兜剿俾丹句踞匪不能互相援應自不難剋期攻拔揚防渡江兵勇既經富明阿飭令聽馮子材等調遣馮子材等尤當審度賊情穩紮穩進毋稍大意或爲窮寇所乘屯踞楊厠周莊花市之匪竄及長壽等沙肆意焚掠著李鴻章速派得力將弁實力掃蕩悉數殲除此股賊匪歸路已爲官軍截斷勢必乘虛而北並著富明阿嚴飭水師晝夜巡防毋稍鬆懈如江防喫緊富明阿仍當酌撤南渡之軍沿江填紮力保裏下河完善之區難民紛紛北渡泰興土橋七港圩一帶已有

一萬數千人靖江尤眾該難民等兵燹餘生殊堪憐憫見經富明阿提捐廉俸籌給米石藉資接濟仍恐不敷散給著吳棠李鴻章督飭藩司萬啟琛分飭各地方官設法賑濟毋令一夫失所仍令在防兵弁認真盤詰勿使奸宄溷迹有人奏江蘇抽收釐稅設局過多商販甚累請總設一局將各卡所收之稅併於一處徵收於課項既無短缺而弊竇更易稽查等語著富明阿吳棠李鴻章將抽釐各局逐加查察應如何裁撤歸併之處並著該將軍等會商妥籌辦理原摺片著鈔給富明阿吳棠李鴻章閱看將此由六百里各諭令知之○諭左宗棠奏截剿湖州援賊獲勝並會克嘉興府城及杭州餘杭攻剿情形各摺片湖州大股援賊竄犯桐鄉烏鎮經蔣益澧調派各軍截剿獲勝破其堅壘餘賊竄遁並會合蘇軍攻克嘉興府城在事員弁均屬出力著左宗棠擇尤奏請獎勵

惟嘉興克復後李鴻章派員畱守並分守海鹽乍浦平湖各城見在江陰楊厓一帶尙有賊眾屯踞常州尙未克復曾經諭令左宗棠分兵替防嘉興海鹽等城以便李鴻章所部各軍併力剿辦蘇境之賊著左宗棠仍遵前旨迅派得力將弁駐守各城俾蘇軍得以騰出兵力痛剿江陰屯踞之賊進規常郡昨經李鴻章奏報杭州省城業經浙軍攻克茲據奏稱蔣益澧督飭水陸各軍攻薄餘杭縣城斃賊甚眾遙見杭城西南一帶濃煙四起知官軍業已得手等語杭城此時是否收復著左宗棠確探詳細情形迅速具奏江皖敗賊屯聚湖州如杭州餘杭均已克復卽著左宗棠督率全軍約會蘇軍迅圖湖州殲除巨憝毋令一賊旁竄以期肅清全浙同膺懋賞前次上竄江西之賊已至新城距閩省光邵一帶甚近左宗棠須會商徐宗幹調撥兵將嚴密布置不可令其竄擾完善

降人蔡元吉既據奏稱自投誠以後屢著戰功此次求保文職以自別於降人卽著照所請准其以通判歸部候選以示獎勵將此由六百里諭令知之○諭劉蓉奏通籌見在兵力遵旨分路追剿並布置情形一摺據稱漢南踞匪東竄前隊扶端各逆酋竄往商南浙川一帶後路馬啟各逆伺間圖犯興安經李雲麟調兵截剿馬逆一股狂竄而北其啟逆餘黨及石逆中旗一股亦經官軍擊敗分道竄入鎮安興安以西始就肅清惟蔡逆二順一股欲由蜀河偷渡回川經澄漢營水師各軍擊走退紮雙河口一帶李雲麟擬將蔡逆破滅再行東下追賊曹燦章與洋縣賊匪竄合之後游弋於佛坪地方繞入老林時窺甯陝見飭湘果營扼要堵剿各等語蔡逆二順一股眾約二萬人由郿西上犯洵陽若不先將此股殄除勢必乘虛竄擾復致蔓延李雲麟既指畫輿圖謂蔡逆已入

穀中可期必滅卽著責成該京堂督率所部與劉蓉所派湘果等營會合夾擊迅殄賊氛毋得徒託空言致干咎戾其曹燦章等餘逆亦應力圖按剿以絕根株劉蓉務飭駐守各軍悉力剿捕迅速蕲事仍恪遵前旨東下追賊以收夾擊之效蔡逆既有偷渡蜀河回川之謀駱秉章當飭在防員弁兵勇認真防遏毋令匪蹤得以入境端扶各逆勢極剽悍疊經諭令楚豫兩省督撫派兵迎剿劉蓉李雲麟見擬分派各營由洵陽安康鎮安三路並進爲尾追之師李雲麟擬俟蔡逆破滅順流下駛襄樊相機邀擊爲攔截之師著官文嚴樹森張之萬添派勁旅會師夾剿毋令賊蹤深入腹地致成燎原髮逆裹脅之眾多係德安襄陽黃州之人未必甘心從逆楚軍如能嚴扼襄樊相機截剿則被脅者自必望風解散著官文等妥籌辦理漢南山路崎嶇被擾之後米糧一空劉蓉見統各

軍既以轉運爲難將來出境追賊實有師不宿飽之虞著官文嚴
樹森張之萬於秦軍行抵各該省境內卽著先行籌備一月口糧
軍火毋令缺乏將此由六百里各諭令知之○王子左宗棠奏杭
州餘杭兩城踞逆經官軍於二月二十一日攻剿大勝後勢極窮
蹙蔣益澧親督水陸各軍於二十三日乘勝奮攻慶春良由武林
等門晝夜未息賊膽愈裂是夜啟武林門向德清一路竄走蔣益
澧督隊入城嚴辦賊匪無算當於二十四日將杭州省城克復餘
杭之賊亦於是日由東門逃竄臣於二十一日戰勝後知賊竄必
速卽豫飭各營整隊以待是日見城中火起各營分路跟追至瓶
窯鎮逆賊憑壘死拒臣親督各營前往追剿俟將瓶窯竄賊肅清
再進省垣布置一切所有克復兩城詳細情形容俟查明再行具
奏

得手所有竄逸餘匪卽著左宗棠督飭兵勇迅速追剿盡殲醜類
母畱餘孽聞浙總督左宗棠自督辦浙省軍務以來連克各府州
縣城池茲復將杭州省城餘杭縣城攻拔實屬調度有方著加恩
賞加太子少保銜並賞穿黃馬褂浙江布政使蔣益澧自調任浙
江以來戰功卓著屢拔堅城茲復親督各軍克復杭州省城實屬
奮勇異常著賞穿黃馬褂以示優獎所有在事出力將士著左宗
棠查明擇尤保奏○諭議政王軍機大臣等杭州餘杭兩城攻克
杭州敗匪竄向德清餘杭敗匪亦竄踞瓶窯鎮左宗棠見擬親赴
瓶窯鎮督剿著卽馳赴該處迅速進攻務乘該逆喘息未定之時
將此股悉行殄除其竄往德清之賊亦著左宗棠派兵剿除毋畱
餘孽昨據左宗棠奏稱淳安威坪股匪續圖竄越江西者見仍折
回甯國竄入湖州之孝豐縣侍逆亦由甯國竄入湖州等語是各

路悍黨業已歸併一處正宜乘此軍威四面兜剿著左宗棠迅速
派撥兵將進規湖郡以期一鼓殲除肅清浙境左宗棠既須剿辦
瓶窯鎮之賊又須赴杭城布置兼須進剿湖郡用兵處甚多且距
浙省邊界漸遠賊氛四逼深恐或有疏虞所有浙江及江西交界
邊防著曾國藩左宗棠會商妥籌兼顧嚴斷賊匪竄越之路斷不
可爲其所乘致掣全局廣信一帶地方卽著沈葆楨分布兵勇嚴
密堵扼以防湖郡敗匪竄入毋稍大意蘇省常郡尚未克復楊舍
股匪爲數眾多前經疊諭左宗棠分兵替防嘉興海鹽等城以便
李鴻章所部各軍併力剿辦蘇境之賊惟湖州一城悍賊麇聚若
徒以浙省之師圍攻恐其力不厚諸悍賊尙得伺隙旁竄著李鴻
章酌量移調兵勇會同浙省之師夾攻以期迅速克捷湖郡既克
則蘇省無後顧之憂嘉興等處駐防之兵均可撤回洋將戈登上

年冬間隨同官軍克復蘇州省城曾經寄諭賞銀一萬兩由李鴻章另給銀兩以酬其勞此次攻拔杭城洋將德克碑曾於饅頭山開礮先行轟塌城垛數丈亦應給予獎勵應如何酌給獎勵之處著左宗棠李鴻章會同商酌妥籌辦理以免歧異將此由六百里各諭令知之○諭恩麟奏堵剿甯夏賊匪催陶茂林進攻秦清兩縣訪查官員從賊勸諭紳民捐辦糧草道員和祥病故請卹各摺片甯夏賊匪屢次竄撲滿城及平羅縣洪廣營等處靈州一帶賊蹤紛駁聲息不通中衛地曠兵單不敷防剿恩麟酌撥官兵一千餘名前往中衛又續調前次派赴安定之川勇丁千餘名一併交梁生嶽調遣著熙麟恩麟督飭派出各軍實力進剿迅殲醜類並知會慶昫就見有兵力認真固守以待援軍甯夏平羅等處匪目遊竄以漢圖仇殺被偏生事藉口狡辯梁生嶽以官兵未集權

示羈縻卽令禁止燒殺繳獻城池以緩其謀一面相機布置密籌進剿著熙麟恩麟飭令梁生嶽統率所部力圖掃蕩一俟得有援師卽可奮力攻剿不得專事羈縻致滋貽誤甯夏滿城糧餉鉛藥缺乏恩麟見將皋蘭等處村莊所捐小麥酌提三千石撥充甯夏滿城兵糧另籌銀一千兩解交阿拉善王貢桑珠爾默特咨令雇辦駝隻派員由草地前來裝運解往應需鉛藥恩麟亦飭甘涼各營量爲分撥仍由阿拉善所部轉運該滿城危如累卵亟應速籌接濟卽著照恩麟所擬一面知照阿拉善王貢桑珠爾默特安設臺站疏通文報甯夏滿城嗣後兵食儻有不足仍著熙麟恩麟設法源源接濟毋令缺乏南路之西和鹽關鎮賊匪與官軍久持屢出奔竄著熙麟恩麟督率林之望痛加剿洗迅殄逆氛清水縣之張家川秦安縣之蓮花城等處賊匪時聚時散肆意衝突非厚集

兵力不能迅期殄滅陶茂林一軍本俟汧隴蕨事後卽當移師赴甘著多隆阿檄催陶茂林轉戰而前會合林之望張華之兵將張家川蓮花城之賊次第剿辦悉數殲除然後由秦安徑赴隆靜與雷正綰之師東西夾擊以收破竹之效雷正綰務當節節進剿俾該逆腹背受敵應接不暇方可痛殲羣醜多隆阿見在督辦陝甘軍務應如何分撥勁旅妥籌兼顧之處著該大臣酌度辦理都司王錫爵投入靈州賊巢署甯夏縣知縣彭慶章遊擊保立自甯夏失陷後徧張僞示勒令官民從逆且聯名與洪廣營遊擊甯貴私函勸其投賊以保身家王錫爵等身任職官受國厚恩甘心叛逆實堪髮指著多隆阿照麟雷正綰恩麟設法拏獲於訊明後卽行凌遲處死以昭炯戒據恩麟奏甘肅大營糧餉難由陝省籌撥甘省仍當盡力圖維見飭平涼以西東南各廳州縣勸諭紳民捐辦

糧麪草料其所捐之數或與照例議敘或准其抵收本身應交地丁銀糧隨時分別辦理等語該紳民如能急公好義踴躍輸將卽照恩麟所議行至該護督請照川陝章程興辦畝捐甘省本屬瘠苦見又瘡痍滿目民不聊生豈可再加股削恩麟所請辦理畝捐之處著毋庸議署甯夏道和祥帶兵前赴中衛在途病故奏請議卹和祥尙有被參各案未經辦結所請照軍營病故例議卹之處著俟定案時再降諭旨至甯夏道一缺卽著恩麟所請准以朱百川暫行護理卽赴中衛會同梁生嶽併力進剿將此由六百里諭知多隆阿熙麟雷正綰並傳諭恩麟知之○予甘肅殉難副將勒豐阿知府呂際詔等祭葬世職○癸丑諭議政王軍機大臣等馮材魁玉奏楚軍克復句容見擬移軍會擣丹陽一摺鮑超官軍由東壩進剿句容馮子材等復派陶茂森各軍由東昌街直擣句

容之北進薄北門鮑超之軍已由南門攻入立將縣城克復句容與丹陽互爲犄角此次鮑超督軍進偪一戰而下堅城剋辦甚爲迅速深堪嘉尙其句容餘賊竄往何處未據馮子材等奏明著卽飭令鮑超等查明追剿丹陽之賊此時聞風喪膽著會國藩卽檄飭鮑超移得勝之師疾擣丹陽使該逆不遑喘息富明阿所派渡江兵勇先後八千餘名詹啟綸已直抵丹陽北門外頗有斬獲富明阿卽飭該總兵與鮑超之師南北夾擊迅圖攻拔馮子材以寶堰屯甸一帶尙有逆壘未平飭陶茂森移軍埽蕩著迅將寶堰甸逆壘削平卽乘勝併力丹陽以期功收破竹其金壇一城賊勢自己窮蹙如機有可乘各路官軍亦可分兵掩襲使各城次第收復早奏膚功李鴻章派攻常郡之師前以賊氛內竄致稽戰事此時丹句敗逃之逆更恐窮極鋌走思犯毗陵如能早將常郡攻克

或不至爲所牽掣見在攻剿情形若何著飭李鴻章等一面迅圖克復常州一面嚴備丹陽之賊續行內犯毋稍疏虞將此由六百里各諭令知之○諭前因甘肅甯夏失守該處可由蒙古草地直達歸綏該二城官兵深不足恃因諭令都興阿由揚防前往該將軍奏明取道京師較爲直捷茲據到京查其所帶兵力僅止三百名爲數甚單因思僧格林沁派駐山東恩縣定安所部有黑龍江營總依能額等所帶兩起黑龍江官兵三百六十餘名若令調赴歸綏交都興阿統帶則兵力較厚庶足以資鎮壓至歸綏乃係扼要地方亟應妥籌防剿著僧格林沁卽飭定安將所帶黑龍江官兵三百六十餘名交營總依能額管帶卽由恩縣拔隊前赴歸綏歸都興阿調遣該將軍剋日由京啟程此項官兵由東取道直境甚爲便捷並著飭催迅速啟行其定安所部駐紮恩縣之兵如須

添補卽著該大臣另爲籌撥以資彈壓僧格林沁自蒙赴豫何日
啟行何日可到許昌張總愚股匪出山以後各路官軍兜剿如何
陝省漢中出竄逆匪已由商南竄越豫省內鄉等境尤恐其與張
總愚等句合而鄧州新野又恐爲沿漢下竄之賊紛擾陳大澣股
匪擾及襄樊亦恐其與漢中竄匪潛謀合併該大臣抵許昌後作
何籌布鄂豫各軍堵剿是否得力應令如何協同剿辦之處著卽
迅速奏聞以慰懸廑將此由五百里諭令知之○甲寅諭內閣嘉
興杭州兩府先後克復該府屬地方久爲賊踞小民慘遭荼毒蕩
析離居田土荒蕪殊堪憫惻所有杭州嘉興兩府屬新復各州縣
地方著加恩將同治二年及三年分應徵錢漕悉行蠲免其未經
克復之湖州一府暨石門等縣並著於克復後查照杭嘉兩府蠲
免章程一律辦理該督撫卽刊刻謄黃徧行曉諭並督飭各地方

官吏安集流亡妥籌撫恤務使實惠及民毋任吏胥舞弊用副朝廷軫念殘黎至意○諭議政王軍機大臣等張集馨奏陝省回務漸就肅清南山髮逆尙未竄盡調兵嚴防潼關一摺據稱多隆阿右眼鉛子尙未取出不時疼痛昏迷覽奏實深廕繫多隆阿當設法醫治以期剋日痊愈用慰懸念穆圖善見已幫辦軍務署理關防一切相機調度責無旁貸著卽督飭各軍西剿回匪南防髮逆務當妥籌兼顧毋稍疏虞雷正綰督勇援甘責任甚重見在靈臺汧隴埽蕩肅清涇州後路無虞梗阻該提督尤當督率陶茂林曹克忠激勵各營鼓行而西盡力剿洗毋得任意遷延自干咎戾逆匪曹背時見與藍逆各股分踞甯陝廳之金雞河八斗坪等處雖經該廳兵勇民團擊卻該逆尙在鎮安而藍二一股游弋於蜀河一帶逼近洵陽是漢南餘孽勢尙披猖著劉蓉恪遵前旨會同李

雲麟迅將曹藍各逆悉數殄除儻任其盤踞蔓延蹂躪不已或聽其結隊東竄徒事尾追以塞責必惟劉蓉李雲麟是問曹藍等逆均由川省竄入漢南劉蓉等攻勦緊急難保不遁回蜀境駱秉章仍當督飭在防將領嚴密防範期於迅殄逆氛豫西捻匪竄至盧氏縣之漫川鎮該縣毗連閩鄉盧靈關一帶防堵最關緊要著僧格林沁張之萬嚴飭諸軍速將此股迎頭截勦埽除淨盡勿令窺伺秦疆參將雷顯揚已到潼關防所著穆圖善張集馨嚴飭該參將等認真堵禦不准稍涉鬆懈沈桂芬仍恪遵疊次寄諭分飭各營嚴防河岸毋稍大意駱秉章等奏官軍攻勦松潘逆番克復疊溪一摺疊溪營城業經克復賊日日吉亦已被殲該逆首自必聞風喪膽著駱秉章檄飭蹇閻聯昌等移得勝之師乘機進勦務將逆首擒斬以杜後患並飭該文武員弁嚴防西北兩路毋令竄入

甘肅等處前據劉蓉奏川省之綦江縣復有黔匪竄擾該督本日奏報何以尙未提及著卽星速奏聞仍飛飭劉嶽昭督率所部前往截擊毋令闖入蜀境將此由六百里諭知僧格林沁多隆阿雷正綰穆圖善駱秉章張之萬沈桂芬劉蓉李雲麟並傳諭張集馨知之○命西安副都統穆圖善幫辦欽差大臣多隆阿軍務並暫署欽差大臣○予山東被戕在籍道員李澤長祭葬世職陝西殉難知縣慶霖傅恩煦祭葬世職建祠○乙卯諭議政王軍機大臣等雷正綰奏疊平賊壘靈崇後路肅清分軍規取平涼一摺另片奏請將西南之清水等處兵勇交陶茂林就近節制請飭陝西勸捐糧石濟餉各等語慶昫奏甯夏近日防守情形一摺覽奏均悉雷正綰由靈臺截剿汧麟竄逆後復自崇信連克雙廟集神浴河白水鎮眉見鎮等處賊巢更番移營前進靈臺崇信後路一律肅

清見與陶茂林晤商該提督由東北白水鎮四十里鋪一帶陶茂林由西南華亭一帶分道規取平涼府城所辦均屬妥協著卽會同陶茂林剋日進取平涼以期漸次掃蕩被脅難民自應准其反正如有真心從賊者仍應分別嚴懲該提督由東北路進兵與西南聲息不通所有清水安定隆德靜甯一帶兵勇卽照所請交陶茂林就近節制訓練以專責成卽著熙麟雷正綰傳知陶茂林認真統率並須兼顧蘭州省城不得稍有疏失所請於陝西北山一帶勸捐糧石以濟軍食著張集馨遴派妥員會同雷正綰所派之員實力勸辦但不得指定十分之一以免騷擾並著熙麟設法接濟雷正綰營糧石藉收飽騰之益曹克忠見在駐軍何處應由何路進剿著多隆阿等迅飭進兵以收夾擊之效多隆阿傷病疊經寄諭詢問如子已取出傷可無礙卽著迅速馳奏仍一面督飭穆

圖善雷正綰等分道進剿迅速奏功以赴委任穆圖善既已幫辦軍務暫署關防不獨剿辦陝省回逆是其專責卽漢南髮逆亦應幫同劉蓉妥籌截剿不可顧此失彼慶昫等奏甯夏匪眾情形時來撲犯該將軍等固守待援見據恩麟咨稱已在中衛左近捐籌小麥三千石馱運接濟著該將軍等嚴催運送仍督率在城文武固守待援毋稍疏忽此後仍著熙麟會同恩麟隨時設法陸續解濟以蘇民困訥欽一軍前經諭令速援甯夏並著派員催提內外夾擊以保危城訥欽之兵未經行陣該署提督恐難獨當一面前諭多隆阿揀派大員幫同訥欽帶兵剿賊卽著多隆阿穆圖善迅速妥籌調派馬隊五百名會否派往並卽催令啟程以資得力雷正綰攻剿平涼如已得手卽分軍前赴甯夏會同慶昫痛殲醜類規取郡城無失戎機將此由六百里諭知多隆阿雷正綰穆圖善

慶昫照傳並傳諭張集馨知之○予甘肅陣亡知州談保和祭葬世職○丙辰諭議政王軍機大臣等見在蘇杭均已克復金陵圍攻日緊前閱李鴻章奏內有三四月可以克復之言當此大功垂成各路統兵將帥及各該督撫允宜同心勦力以期其濟自陝省漢中之賊出竄甯陝商州一路並有分由漢江水路下竄者節據多隆阿張集馨等奏報漢南賊欲回救金陵約於鄂省襄陽老河口等處會齊官文等前奏克復厲山並棗陽霸山解圍收復上津堡等情形摺內具稱藍二順首惡稽誅漢南逆匪悉數東下張總愚股匪自南魯山中逸出逼近南陽豫省敗捻又越棗陽或由王家河以窺襄樊或由雙港司以達新鄧均未可知襄樊爲全鄂上游南北鎮鎗東西北三面之賊紛沓而來鄂軍能否自固藩籬猶無把握所派成大吉歐陽正塤梁作楫及副將龍藻琦都司周有

全總兵周鳳山等水陸各軍分駐襄鄖並當陽各處以上各軍是
否均已到防何以各軍戰守情形經月全無奏報當此金陵垂克
之時若令賊得肆其狡謀於襄樊一帶會齊乘上游建瓴之勢順
流直下將使圍攻金陵大軍爲所牽動豈不又礙全局官文嚴樹
森如不能將此賊嚴密防剿致誤大局自問當得何罪軍情緊要
鄂省各路官軍深恐事權不一爲兵家大忌官文嚴樹森二人內
卽當商定一人出省督辦防剿毋得安坐省垣一任賊之紛竄俟
得有勝仗一奏塞責以爲了事並著於商定出省後一面迅速奏
聞會國藩能否親往金陵督辦攻剿見在襄樊喫緊該處爲金陵
及皖省上游亟應豫爲防範不可稍涉大意該督前奏楊岳斌統
帶師船嚴防江面不能調往他處此時江面上游有事著卽於楊
岳斌彭玉麟二人內酌畱一人防江一人溯流而上以資防剿如

鄂省派出成大吉等軍無所統率楊岳斌等無論何人前往均可登岸將鄂省各路陸軍併歸統帶調遣以期得力僧格林沁日內當已行抵許昌該處與襄樊較近軍情賊勢諒能偵查明晰張總愚股匪出山以後剿辦若何漢中竄匪逼近內浙境地一犯南陽與襄樊賊股又虞串合而張逆一股前據張之萬奏竄及嵩縣等境該處又與河朔切近有關北路之防究竟中州軍務見以何路最爲緊要著僧格林沁於抵豫後酌量緩急將各軍分別調遣並著一面迅速奏聞其襄樊一帶竄賊官文嚴樹森必當嚴督將士剿除淨盡不准有以鄰爲壑之心並不准因有僧格林沁在豫稍存推諉會國藩爲國重任身繫東南全局安危官文等向來辦理軍務尙能不分畛域均屬有功之人值此大功垂成應始終罔懈同濟艱難以維全局若令垂成之功又有中變事屬何人貽誤必

將該督撫重治其罪不能以前此有功稍存寬宥也將此由六百里加緊各諭令知之○諭前因沈葆楨奏江右軍務緊要請將茶稅牙釐仍歸本省徵收諭令戶部妥速議奏茲據奏稱蘇浙敗賊奔突堪虞儻防禦稍疏不獨江西遭其蹂躪卽會國藩亦添西顧之憂會國藩軍營各省協餉及釐金等款爲數甚鉅通盤籌畫尙可補苴措拄其江西茶稅牙釐請擬照該撫所請歸本省分提一半等語江西防剿見在極形喫緊與其糜爛之後分兵籌餉不如先事豫防俾江省得以自固藩籬卽會國藩亦可專力東南著照該部議准如該撫所奏將江西牙釐茶稅由本省分提一半作爲該省防餉其餘一半仍歸會國藩軍營俾得各資接濟原摺著鈔給閱看將此由五百里各諭令知之○丁巳諭內閣本日據多隆阿由八百里馳奏全陝回務肅清一摺此奏殊涉鋪張陝西回匪

自多隆阿入關後節節掃蕩地方漸就肅清惟此項匪徒逃入甘省根株尙未淨絕前經明降諭旨命多隆阿督辦陝甘兩省軍務該將軍正宜乘此聲威督飭各軍分路進剿將回匪悉數殲除俾漢民夏回得以安居樂業仰慰朝廷除莠安良之意漢南竄匪尙未殲除亦應會同劉蓉分兵截剿俾全省一律肅清方爲不負委任見在朝廷但求實際不尙虛文該將軍仍當督飭各將士奮力進取以竟全功而膺懋賞有厚望焉○李鴻章奏常州丹陽竄擾江陰常熟股匪經我軍力戰解圍該逆仍踞江陰東南歸路已斷賊數雖眾屯駐楊庫華市周莊沙山五六十里聞面面有我軍屯紮常州丹陽踞逆屢由江陰青山等處衝入接應均被我軍剿回賊漸危蹙二月二十四日臣添調劉士奇等帶隊二千人會合郭松林循福山鹿苑江岸偪剿臣於三月初二日由蘇州馳赴長涇

親督各軍會戰初六日臣派令各軍分路進擣華市行抵沙山腳距華市三里賊眾列隊山阿倚營拒敵劉士奇等帶隊鈔入營後槍礮環施賊陣稍亂鄭國魁等乘勢督隊撲營拔椿踰濠一擁而進賊眾敗潰緣山亂竄臣飭各軍分道猛進追殺四十餘里賊屍枕藉自華市至樹山賊壘百餘處一律埽平日已嚮晦遂令李鶴章等繞至江陰會合駱國忠等由北路攔頭截剿劉士奇等帶隊暫駐周莊邀擊楊庫竄路臣督鄭國魁等軍馳往青陽會合楊鼎勳等由南路從後兜剿是夜五鼓楊庫踞賊惶遽南奔欲併歸雲亭一路劉士奇等設伏於雞籠山下太平橋賊整隊來衝我軍槍箭齊施賊眾駭奔乘機蹙之落水死者無數先是初四日夜偽英王叔及忠逆之子兩股因東路援軍大至率眾由華市花山馳回三河口乘夜搭造浮橋三道憑河築壘以護初五日張樹聲等以

小隊誘敵逆眾二三萬由秦望山包裹而上張樹聲等力戰卻之
擒斬六百餘名是夜又在三河口添搭浮橋二道初六日華市周
莊楊庫敗賊併聚雲亭花山一帶北抵南牖南至越城橋圖竄丹
常李鶴章夜抵江陰飛令郭松林等分路會剿初七日辰刻郭松
林李昭慶列隊南牖前面駱國忠由花山鈔擊該逆見眾軍堵住
歸路拌死來撲黃兆來等迎戰將賊衝作兩段前隊萬餘人向越
城橋西奔後隊二萬餘人由花山奔竄郭松林躍馬橫出直撲三
河口賊營賊卽棄壘渡河浮橋五道擠斷其四人馬落水堆積數
丈河爲不流楊鼎勳等復由閒道截住前後夾擊其未過河之賊
或陷入圩中或棄械乞降數以萬計其已過河之賊張樹聲等分
追截殺賊屍遍野餘眾星散日晡收隊統計各軍俘獲近二萬人
沿途淹斃殺斃無數其逸回常州丹陽者約僅二三千人訊據擒

賊供稱僞王侯及大頭目鮮得脫者查此股逆眾經諸軍兩日痛
剿擒馘解散實有二三萬眾緣歸路先斷子藥俱盡該逆遂不耐
戰大半徒手受縛所擄百姓米糧衣服概行拋棄當卽散給窮民
見在沿江腹地一律肅清所有守城殺賊尤爲出力各員謹先行
開列懇請從優獎勵其餘出力及傷亡員弁兵勇可否彙案獎卹
之處出自恩施 上諭議政王軍機大臣等此股逆匪爲金陵常
州外援官軍於兩日閒將該逆二三萬眾悉行剿除解散賊僞王
侯及大頭目鮮得脫者沿江腹地一律肅清辦理甚屬妥速此時
常郡賊援已絕李鴻章正宜移得勝之師會攻常州迅拔堅城以
斷金陵外應仍一面分軍規復金壇毋稍延緩鮑超自克句容後
進攻丹陽此時曾否得手並著曾國藩檄飭該提督並飭知馮子
材等軍會同夾攻丹陽迅將該城克復以期肅清金陵東路見在

金陵賊勢當更窮蹙值此功在垂成務當慎益加慎曾國藩當飭
圍攻金陵各營將士嚴密防範以杜該逆出竄毋稍大意程學啟
槍子取出後續據李鴻章奏漸有轉機此次報內未經提及是否
痊愈著李鴻章遇便奏聞戈登輕進失利情形如何何以幾覆全
軍並著李鴻章詳細具奏道員張樹聲前經李鴻章奏請記名簡
放與吏部奏定章程不符此次復由常州分兵堵紮要口挫斬甚
多著交軍機處存記候旨簡用降調總兵鞠耀乾前失守福山李
鴻章因其熟悉江面水師情形且前次曾有戰功奏請以水師參
將降補當經降旨允准茲據給事中王憲成奏稱該撫前奏懲處
該總兵之處與條例不符請照例治罪一摺著李鴻章將鞠耀乾
功罪是否可抵之處查明覆奏原摺著鈔給李鴻章閱看將此由
六百里各諭令知之○諭多隆阿傷病情形屢降諭旨詢問此次

謝恩摺內具稱奉到寶去如意拔毒散當卽敷治神氣稍清可有生機而受傷處所槍子尙未取出覽奏彌深虔念陝省回匪雖就肅清而漢南竄匪尙肆擾於鎮安蜀河一帶甘省逆回盤踞平固甯夏等城多隆阿遽以陝省肅清鋪陳入奏且由八百里馳遞紅旗報捷而所保之員又非專指盤屋克復案內而言殊屬誇張失實甚非該大臣向來忠勇樸誠辦事情狀且於張集馨等各員附片陳請特予鼓勵覽奏之餘深恐多隆阿傷病昏迷於此等奏報失於察奪尤難保非其左右辦事之人欲得保舉意存見好乘其病中脅亂所爲姑免深究仍著多隆阿趕緊設法將傷口槍子取出調治速愈以資倚任張集馨係棄瑕錄用之員見以臬司暫護撫篆德興阿亦係棄瑕錄用見以副都統署理將軍卽官銘亦監司大員且係官文之弟其爲賢否與平日辦事情形朝廷豈不深

知予奪用舍自有權衡何必該大臣特爲陳請至雷正綰等各員自係衝鋒打仗及隨營辦理軍務出力之人亦經屢次優加獎敘如果陝甘兩省回匪軍務普律肅清仍當覈其勞勩論功行賞此單著卽畱中俟陝甘軍務全行肅清再行降旨穆圖善署理關防於軍務一切自當懷遵前旨督飭各軍西剿回匪南防髮逆相機調度妥籌辦理劉蓉身任陝撫於陝省收復各郡縣地方善後事宜尤屬責無旁貸著卽飭藩臬兩司妥籌辦理鎮安一帶竄匪劉蓉前奏與李雲麟商定督率各軍分投截剿究竟能否得力不至任賊再行紛竄肆擾鄰疆此時盤屋旣克多隆阿所部諸軍應如何商同調遣著卽與多隆阿穆圖善會商布置雷正綰與陶茂林均已師偏平涼該提督前請與陶茂林分路統率以專責成之處當經寄諭准如所奏辦理著卽迅速進兵攻拔平涼以次漸圖埽

蕩熙麟尙駐慶陽一隅之地於全甘地方不足以資控制恩麟暫
權督篆爲時已久恐於一切呼應不靈致多貽誤見在雷正綰等
之軍已偏平郡慶陽不過糧臺轉運如有明幹道府之員卽足以
資任使著熙麟酌量刻下慶陽無甚緊要事件卽當作速前往蘭
州接篆視事或慶陽糧臺一時未有更替得力大員卽俟文煜到
後交其管理亦卽速赴蘭州以愼封守而重委任將此由六百里
各諭令知之○戊午諭議政王軍機大臣等通政使司通政使王
拯奏江浙踞逆日就削平事機至緊第皖軍仰食仍惟江省總臺
是賴以兩湖捐釐之數爲皖軍十萬養命之源不特浙餉不能分
撥卽曾國藩所部月餉亦止能放數成粵東情形迥非昔比釐捐
一項籌辦綦難近日沈葆楨又因江西剿賊緊要請將協皖餉銀
酌定分數並於茶稅牙釐項下分提其半以爲本省之用誠恐軍

前將卒傳聞餉源將窒眾心或生觖望殊於大局關係非輕請飭江皖楚粵各疆臣同心勦力以求其濟各等語近日蘇杭疊復金陵合圍江浙地方可望以次肅清惟常郡丹陽尙相犄角浙賊悉萃湖州其竄入江西之賊又蔓延於撫建一帶並有由瀘溪新城而潛越閩境者若非任事諸臣和衷共濟迅將金陵老巢剋期攻拔並將各路竄踞餘匪悉數殲除萬一師老財匱必致餘燼復然不可收拾從前和春張國樑等大軍之潰卽由司計者掎克月餉所致王有齡因守杭城亦以王履謙等不能接濟致浙省淪陷於賊前車之鑒可爲寒心著官文嚴樹森譚世臨將辦有成效之釐捐隨時整飭源源接濟皖餉毛鴻賓郭嵩燾於粵省釐捐一項恪遵屢次諭旨妥爲區畫務令利歸公家毋資中飽以裕餉源沈葆楨因本省剿賊亟須暫將稅釐提出一半充餉亦是實在情形第

皖軍圍緊全局沈葆楨平日公忠體國畛域不分仍著於無可籌畫之中力圖撥解皖北地方新復如有可以設法接濟之處並著會國藩喬松年酌度辦理原摺著摘鈔給與官文等閱看將此由六百里各諭令知之○諭富明阿奏揚防官軍擊退丹陽援賊並續撥兵勇渡江助剿馮子材等奏官軍會擣丹陽連日接仗情形各一摺丹陽一城與常州金陵互爲犄角見在詹啟綸張文德已直薄城下揚鎮兩營之兵共有一萬五六十名富明阿此次又添派營總富陞等馬步兵勇一千一百餘名兵力已不爲少著卽督率詹啟綸等實力進攻迅拔堅城盡殲醜類鮑超自克句容後曾否會攻丹陽並著飭令詹啟綸等與鮑超一軍聯絡一氣勿任窮寇復竄他處致辦理又形棘手倘英王叔陳逆兇狡爲諸酋之冠此時悉眾來援勢必拌死力鬪圖解城圍在事各員務令嚴密防

維相機痛剿無爲所乘將此由六百里各諭令知之○諭勞崇光奏確查滇省近日實在情形官軍剿辦回逆克復景東元謀等廳州縣暨楚雄府城各一摺另片奏馬如龍忠義自許必能殄滅巨憝擬卽以回攻回及新選維西協副將尙阿布等不宜署理昭通鎮等缺各等語前據賈洪詔奏徐之銘徇私濫保請將所保各員撤銷當經明降諭旨照准當因滇省尙未進兵恐失職人員必懷怨望諭令賈洪詔將此旨收存相機宣布茲據勞崇光奏馬如龍彈壓省垣籌濟糧餉軍火岑毓英帶兵出省數月之中克復堅城十數處請溫語褒嘉將馬如龍賞加提督銜岑毓英賞加布政使銜仍將該二員一併賞加勇號自係爲鼓勵人材起見馬如龍岑毓英均曾經徐之銘保奏前次所降諭旨應在撤銷之例若徑照勞崇光所請辦理不免與前旨兩歧著勞崇光賈洪詔速將官

軍攻克楚雄府及景東廳縣出力各員確切查明具奏再降諭旨
前旨仍著買洪詔暫緩宣示勞崇光奏稱訪察馬如龍岑毓英行
事不過因初登仕版不諳體制小節多疏而其心實皆勉圖上進
其才亦尙可用馬如龍擬俟剿除杜汶秀後再將馬榮馬聯陞二
犯設法擒斬勞崇光見在責成馬如龍岑毓英就本地選募回練
次第剿辦既不至多糜官餉而已撫之良回不至再生疑忌等語
勞崇光如確有把握卽著嚴飭馬如龍等迅速進攻大理府城將
杜逆剋日誅滅以自明其心迹且徐之銘係奉旨革職拏問之員
何以日久尙未起解並著該督責令馬如龍等速將徐之銘派員
押解來京毋得任意延玩自取罪戾尙阿布係部選人員既據勞
崇光奏稱該員於滇省情形未能熟悉卽著照該督所請仍委楊
盛宗署理昭通鎮篆王棟是否聽同人指揮左葆楨於昭通府一

缺能否勝任著勞崇光賈洪詔會商委署期於地方有裨各省武職凡有總督駐紮者向由總督專政巡撫並不與聞嗣後滇省委署鎮將以下各缺卽著勞崇光斟酌辦理如賈洪詔有所見聞亦不妨彼此函商以盡同舟共濟之誼其文職各員該督撫仍當和衷商榷會同委署斷不准各存意見致有齟齬福陞關其無能已於上年據駱秉章參奏將其革職雲南提督一缺已放唐友耕勞崇光何以尙未知悉勞崇光見駐黔省於滇省聲息尙能相通成都則非滇撫駐紮之地且去滇較遠此時蜀境防務已鬆劉嶽昭所部九營前已由秦回蜀賈洪詔當督同該臬司馳赴昭通府城將剿匪事宜次第辦理勞崇光俟交查之件辦理完結亦卽前赴昭通與賈洪詔面商進止機宜較爲有益勞崇光等奏滇黔兩省餉項萬難各省協餉屢催不到請仿照湖南東征局章程於川省

水路設局抽釐卽委川東道吳錫專司其事各摺片設局抽釐原屬萬不得已之舉湖南冊設東征局照該省釐金減半抽收以爲接濟楚軍之用楚人自樂於從事若於川省大江要路夔州重慶敘州瀘州凡有釐金之處添設滇黔釐局所收之項滇黔兩省各半支用恐不無窒礙難行之處如果於川省無損於滇黔餉需大有裨益自當照湖南章程妥爲興辦勞崇光見已委派大員赴川省會議著駱秉章察度情形據實具奏該督素顧大局當不以事屬鄰封稍存畛域之見勞崇光等原摺著鈔給駱秉章閱看前寄賈洪詔諭旨及明發諭旨並著鈔給勞崇光閱看將此由六百里各諭令知之○己未諭議政王軍機大臣等富明阿奏水師上下游疊獲勝仗江防布置情形並詹啟綸擊敗丹陽援賊各摺片逆匪因人眾糧絕趨重上下游爲擄糧謀生之計雖經吳全美等師

船擊敗難保不悉數回撲沿江紛竄著富明阿仍飭吳全美督帶
師船策應江面並於各沙要隘上下梭巡以期聯絡聲勢北岸一
帶尤須加意嚴防前據富明阿奏稱詹啟綸等軍業已直薄丹陽
城下此次截剿援賊頗有斬擒卽著富明阿馮子材魁玉仍遵前
旨督令詹啟綸等並添派之富陞等軍與鮑超之師聯絡進剿迅
拔堅城盡殲醜類僞英王叔陳逆悉眾來援旣據賊匪供稱見在
逆眾五六萬散布錢家廟等處打館擄糧並欲會合城賊夾攻官
軍營盤又在港口搶奪民船冀圖外竄使官兵首尾不能相顧各
情逆謀兇狡著富明阿馮子材等嚴飭在事員弁務須嚴密防維
不得稍涉大意將此由六百里各諭令知之○諭張之萬奏髮逆
圍攻內鄉官紳竭力解圍陳大禧未遂句結張總愚竄盧氏之轅
川見飭繞前截剿一摺豫省宛洛一帶寇氛四集防不勝防目前

軍務以先勦張總愚爲要領張之萬已飛飭張曜宋慶等軍繞出其前扼紫桃灣以防西竄朱陽關之路並令善慶等馬隊會合勦洗著卽嚴飭該將領等卷甲疾趨滅此朝食毋再任其蔓延張曜前由黑峪追勦張總愚擒斬甚少竟成尾追之勢此次若再不得力卽由僧格林沁張之萬嚴參懲辦陳大澐回竄浙川之李官橋襄陽之老河口髮逆竄商南之竹林關等處是襄鄖二府均屬十分喫重官文等一月無報實屬不知緩急究竟所派之梁作相等軍能否得力應否添調新軍均須認真布置不至縱匪深入蹂躪地方該匪本爲圖救金陵而來若由隨棗黃麻直趨英霍或由水路順流而下則曾國藩不能不力爭上游恐於金陵垂成之局又生枝節襄鄖一帶地勢寬廣官文所派防邊各將職分相等無所統率必將貽誤事機漢南前軍可鑒官文嚴樹森當懷遵十六日

諭旨卽日商定一人出省督師一人留辦防務不准稍有遷延致干咎戾並仍遵前旨飛咨會國藩移調楊岳斌等水師於襄樊一帶督同陸師夾剿僧格林沁見已由許州取道長葛新鄭等處進紮洛陽該親王威望素著各逆自必望風逃避惟當通籌數省大局移緩就急妥籌調度並嚴督各軍會合豫軍剋日將張總愚一股先行剿除再將各股以次掃蕩見在陳大澹一股及漢中竄逆一股均聚內鄉內鄉以北有僧格林沁駐紮洛陽之師足資捍禦其由內鄉以東係髮捻圖援金陵之路著僧格林沁一面迅飭蘇克金等軍由南陽進兵剿洗一面嚴飭張之萬等派撥重兵扼其東竄免致由豫入皖掣動金陵大局其分竄老河口捻股著官文等督飭嚴密截剿以上各路竄匪如由何路掣動大局惟何省督撫是問其應於何路扼要設防之處並著僧格林沁官文等悉心

調派彼此知照無誤事機張之萬另片奏汝南各軍攻克小鄭寨
見在圍攻趙寨及信陽州知州宮國勦剿捕龍井餘匪正陽縣知
縣白渠攻克周寨各情著該撫會同毛昶熙督令汝防各將士及
地方團練將趙寨及未復各寨次第攻克以靖地方原奏稱攻克
信陽州之龍井寨有出示安良另派首事之語信息一帶圩寨林
立總因首事者不得其人往往投誠後旋即反覆衆爲害張之
萬諒已深鑒此弊所派首事務須慎選安分馴良之人不得敷衍
目前意存遷就將此由六百里各諭令知之○諭多隆阿奏全陝
軍務漸就肅清所統全軍應赴援何省請旨遵行一摺另片奏軍
餉支絀派員赴同朝一帶試辦捐輸等語前因盤屋克復陝省逆
回掃除殆盡降旨命多隆阿督辦陝甘軍務原以該大臣征剿髮
逆戰功卓著自調赴陝西剿辦逆回屢戰皆捷逆眾望風披靡俾

各處踞匪次第蕩平而甘省回匪勢尙猖獗陝南餘匪尙未撲滅必得該大臣總統諸軍運籌決策乃能所向克捷迅奏膚功多隆阿此次摺報自係未接奉前旨故有請旨遵行之奏據奏槍子雖未取出久之與氣血相屬卽於身體無傷並據穆圖善奏稱多隆阿自敷貼拔毒散後頓覺痛減神安覽奏頗爲欣慰仍著發去如意拔毒散兩料交該大臣祇領趕緊醫治以冀速痊所稱部曲均係南人每以北地苦寒不服水土爲慮自係實情惟刻下陝省匪回逃入甘省者不少甯夏平涼等處均尙爲回匪占踞其餘亦皆徧地伏莽未受大創僅恃雷正綰陶茂林兩軍其力尙薄且無所稟承亦恐呼應不靈進剿未能得力甘肅勢據上游回氛一日不靖則山陝皆難安枕唇齒輔車最關緊要多隆阿本係西安將軍又有督辦陝甘軍務之責而回匪又皆震懾該大臣之威自應以

庫清兩省爲己任惟據稱所部不服水土若強令入甘恐多渙散
著該大臣毋庸親督各軍深入甘省仍駐西安調理傷病一面將
勦辦甘肅回匪事宜妥籌調派劉蓉所部兵勇爲數不少川勇固
可調赴甘肅卽楚勇亦在川日久習慣自然著該大臣與劉蓉籌
商調其所部得力宜於入甘者數千名可否卽派穆圖善統帶前
往或另爲一路或卽爲甯正綰後路聲援其入甘以後應由何員
統率各軍總歸該大臣節制調度之處均著多隆阿妥籌辦理漢
南踞賊尙與劉蓉李雲麟相持不下仍恐乘虛窺伺陝西腹地及
楚蜀邊境多隆阿所部不宜入甘之軍正應移勦此股賊匪或繞
出潼關迎頭截擊或於陝南一帶攔腰截擊儻賊匪東竄卽可追
出陝境盡力勦洗如在豫境則此軍可卽交僧格林沁調遣在鄂
境則此軍卽可歸官文等調遣如此量爲移調兵力旣可因地制

宜餉項亦可於楚豫兩省分任兼籌係屬兩有裨益多隆阿所部各軍由東南而西北轉戰數省均甚得力此次如能截剿髮捻不令東竄掣動大局則金陵指日可以克復將來該大臣所統之軍亦必同膺懋賞多隆阿卽將此旨豫行宣示諸軍俾各奮勉圖功以副委任同朝一帶殷實之戶漸必復業該大臣因餉需不繼勸辦捐輸著劉蓉督率地方官會同多隆阿委員妥爲經理昨有旨令熙麟迅赴蘭州省會期於整頓一切茲據奏稱慶陽係糧臺重地爲甘省東北屏藩陝省西北保障等語著仍遵前旨赴蘭州接印任事的派一軍駐紮慶陽以資防剿熙麟或俟文煜到慶陽接派糧臺後再赴蘭州並著該督斟酌辦理另片奏雷正綰由涇拔營赴靈畱步隊四營令成祿統領駐涇等語雷正綰見與陶茂林等分道進取平涼卽著該提督奮力進攻迅拔堅城毋稍延緩將

此由六百里各諭令知之○命五城煮賑展期兩月○庚申左宗棠奏杭州餘杭兩城經官軍於二月二十四日同時攻克業將大槩情形先行馳奏二月二十一日蔣益澧派提督高連陞等率各營攻清泰門外觀音堂賊壘派副將周廷瑞等率各營攻古蕩賊壘派洋將德克碑用大礮轟攻鳳山門城垣蔣益澧分親兵五哨助之自率四哨爲諸路策應卯刻高連陞等齊抵觀音堂督隊猛進立破賊壘二座賊卡數處聽逆陳炳汶率悍黨萬餘來援蔣益澧與總兵劉清亮等馳至將賊擊退時德克碑在饅頭山開放大礮已將鳳山門城垛轟塌三丈餘蔣益澧調轉大隊搶上高連陞等緊偪城根我軍奮勇先登城賊拌死抗拒高連陞王聯芳均受槍傷猶裹創力戰逾時始收隊還其周廷瑞等進攻古蕩賊壘因賊營隔水環攻未下乃分兵先攻葛嶺之賊忽悍賊千餘由錢塘

門外來援都司賀國輝等擊敗之周廷瑞等乘勢將葛嶺賊壘兩座攻克其斃悍賊七百餘名遊擊徐文秀等又連破武林門外二壘並古蕩二壘追至武林門外十里街始收隊而還二十三日蔣益澧復派水陸各營分攻武林錢塘鳳山望江清泰各門自率親兵往武林門督戰徐文秀等督隊疾至十里街躍進內濠奮勇環攻首逆陳炳汶率悍黨萬餘來援劉清亮等各營分投堵擊賊勢稍卻時周廷瑞等奮攻賊壘勢已垂破城中又出援賊數千蔣益澧飭都司謝茂勝等率洋槍隊緊逼城門轟擊陳逆拌死相持鏖戰三時斃賊極多而官軍傷亡者已四百餘名攻至酉刻收隊是日賊壘雖未攻拔然悍賊已多傷亡聽逆是夜四鼓潛啟武林門逃竄蔣益澧急派徐文秀等軍分兩大隊由武林錢塘等門衝殺而入蔣益澧率親兵繼之將逆賊悉行駢戮賊屍枕藉高連陞等

及德克碑亦各率所部同時由鳳山清波清泰慶春等門梯城而入四路搜殺斃賊數千名生擒千餘名拔出難民無數卽於二十四日卯刻將杭州省城攻克蔣益澧一面分軍移紮各門一面抽派馬隊跟追沿途又斃賊數百名其餘杭踞逆疊經官軍奮擊攻克倉前李家塘等處賊壘斃賊近千名二十日夜臣飭各軍環攻城壘賊勢驚亂至曉收隊已刻復出康國器令遊擊林本等爲前隊同知康熊飛等繼之倉前援賊經參將吳光亮等衝擊斃賊不少乘勢將附近蔣元壩賊卡焚毀僞積王劉逆率悍黨來援官軍立將劉逆轟斃並斬黃衣賊目多名賊卽敗走時倉前援賊由橫渡橋斜鈔而出遊擊蔡盛恩中槍落河身死參將古捷芳亦力竭陣亡勢甚危迫遊擊林珠等率所部突圍而入奮力衝殺賊始奔潰官軍又斃賊數百名其西門南門所出之賊復被截殺無算賊

勢窮蹙將城中輜重婦女悉搬出城外壘中臣知該逆將遁當飭各營輪流猛攻並令礮船駛入餘城南湖以備轟擊城賊益怖二十四日汪逆海洋率黨由東門向瓶窯一路竄走當將餘杭縣城收復已革總兵羅大春等各營分路追殺斃賊甚多追至瓶窯而杭城之賊亦已竄至瓶窯踞逆憑壘抗拒臣得報飛飭各營跟蹤緊追自率親兵繼進賊連夜竄走臣馳抵瓶窯卽飭各營疾追抵安溪關該處悍賊半伏壘中半匿林內妄冀分股包鈔羅大春等先將伏賊按勒殆盡乘勢攻壘賊匪紛紛潰竄當將安溪關要隘攻克餘賊向武康德清等處敗走臣飭各營緊追武康之賊飭道員楊昌濬率親兵暫駐瓶窯爲各路策應蔣益澧分督各營速攻德清石門之賊以期規復湖州斷賊回竄之路竊維杭州爲全浙根本餘杭又爲杭州西北屏蔽逆首陳炳汶汪海洋負嵎死守大

軍數月以來攻勦殆無虛日茲幸兩城同克浙西大局漸可次第肅清見據探報逆首黃汶金李遠繼等屬聚湖州侍逆李侍賢及各悍賊又復竄入是湖州爲諸逆淵藪最爲喫重臣自當殫竭心力慎爲圖之賊在湖境則圍攻賊出湖境則追勦務將巨寇聚殲免致流毒完善地方此次克復兩城在事文武不無微勞足錄浙江布政使蔣益澧等先行懇恩分別優加獎敘其餘出力員弁兵勇可否容臣查明從優保獎出自恩施陣亡參將古捷芳等均請飭部從優議卹臣拜摺後卽入省辦理善後事宜又奏杭州踞逆僞北王錢貴芒前曾遣人納款獻城嗣因人多謀泄被汪逆知覺將內應之人概行殺害錢貴芒卽深自隱飾不敢輕舉自蔣益澧攻入杭城接殺逆匪錢貴芒卽率其黨千餘跪伏道旁泣求免死據蔣益澧稟報前來臣以錢貴芒雖劫於兇威未能立功贖罪而

事前通款實屬尚可貸其一死已飭令分別遣散挑畱 上諭議

政王軍機大臣等前據左宗棠奏報攻克杭州餘杭兩城業經明降諭旨宣示茲復據左宗棠將攻克詳細情形具奏蔣益澧前已賞穿黃馬褂見復賞給雲騎尉世職記名提督高連陞亦賞穿黃馬褂以示優獎左宗棠當飭令蔣益澧等益加奮勉立功自效杭州餘杭之賊併竄瓶窯經左宗棠督兵攻克該逆踞壘並將安溪攔要隘攻奪敗匪分趨德清武康該督見已派兵追躡武康之賊而令蔣益澧督兵速攻石門德清以期進拔湖州郡城著卽嚴督各營將士奮勇進攻毋稍遲緩湖州爲各路賊匪麇聚之區黨與尙多必思出竄江西不肯坐困孤城左宗棠當會同蘇皖各軍分布要隘杜賊出走之路以期聚而殲旃毋得任令紛竄徒成尾追之勢上年十一月間英國總兵戈登隨同官軍攻克蘇州曾經明

降諭旨賞給該洋將頭等功牌並賞銀一萬兩復以外國本有寶
星名目諭令李鴻章將賞給戈登頭等功牌仿照製造變通辦理
嗣據李鴻章奏稱於賞銀一萬兩外先已允給常勝軍犒賞洋銀
七萬元均經如數籌給等語英法兩國中國一例相待不可歧異
左宗棠請賞加德克碑提督銜並賞給大小荷包衣料之處與前
次獎敘戈登諭旨不符未便互有參差本日已於明降諭旨內將
德克碑一例賞給頭等功牌並賞銀一萬兩以示嘉獎矣所有頭
等功牌式樣亦應與前賞戈登式樣一律卽著左宗棠向李鴻章
咨取前式仿照製造並著左宗棠無論何款動用銀一萬兩一併
賞給其片內所稱由該督另行籌給德克碑銀二萬兩分賞所部
常捷軍出力弁兵之處與李鴻章前次另籌洋銀七萬元給與戈
登犒軍辦法相符卽著照所議辦法將來浙省軍務肅清後亦須

將該洋將撤回本國降_日錢貴_日旣經事前通款投誠尙可貸其一死餘黨卽著分別遣散_挑畱將此由六百里密諭知之○以克復浙江杭州餘杭兩城賞布政使蔣益澧雲騎尉世職提督高連陞黃馬桂道員楊昌濬等加銜升敘開復有差權授總兵官德克碑頭等功牌並銀一萬兩予陣亡參將古捷芳等祭葬世職加等○辛酉曾國藩奏金陵城賊常放婦女幼孩出城以爲節食之計洪酋忠逆堅忍異常前兩次掘穿地道及雲梯猛攻均未得手鮑超一軍於三月初六日大破賊於句容城下次日克復縣城擒斬僞漢王項大英僞列王方城_擒從此金陵城外賊壘悉爲我有當不能以大股衝出貽患他方惟營中餉需奇絀米糧昂貴深慮軍心不固另生波折杭城克復後賊由德清併入湖州該處股數日多恐仍前覓食上竄_臣與左宗棠之師在徽浙之交節節布置以

防羣賊再犯江西其前此竄入建昌之賊一趨南豐一趨新城並分股擾及廣昌界席寶田劉勝祥韓進春等均在南豐二月二十三四等日屢獲勝仗斬僞天將譚幅於陣其精健營一軍亦由貴溪馳赴南豐新城若能克復該縣使前股不能立定巢穴則後股亦難跟蹤上竄庶剿辦易於得手沈葆楨奏髮逆窺伺建郡經官軍痛剿後河西賊館旣破宜黃之路亦隔僞沛王遂於二月十九日潛竄南豐縣城僞天將譚幅以悍黨數萬人築壘於城之西北爲固守計僞王宗一股於新城各鄉肆行擄掠僞天將林正揚一股犯廣昌界二十二日席寶田劉勝祥率隊進剿紮營於百花亭距南豐城二十里韓進春營於其右之謝坊二十三日韓進春由右路進踏毀包坊賊館截殺二百餘名逼近城根劉勝祥破其左路山卡與精毅營拏斬各以百計斃逆目金添幅一名該逆退伏

城中二十四日席寶田等分路進攻沛逆譚逆於去城十里之蘿蒲洲迎敵猛撲祥字營數次我軍屹立不動遊擊張集雲等直擣賊堅遊擊陳宜道等分隊旁襲環攻移時都司朱勝祥等以火彈火箭奮擊賊眾大亂沛逆踉蹌入城譚逆負創而西當將北門逆壘四座平毀我軍乘勝截殺逆眾望風駭遁千總會佐朝陣斬偽天將譚幅一名河東之賊由上游淺灘渡河東門亦出賊數千馳援均爲總兵邊曉堂等擊退沛逆復自北門出大股回撲我軍合隊蹙之該逆敗匿城中統計殺賊三千餘名溺斃千餘名生擒七百餘名二十五日韓進春進紮離城五里之樟樹下以牽制城賊三月初一日席寶田等會隊攻城槍礮環施該逆堅匿不出臣以皖浙防兵旣集調回精捷營進新城繼果營進南豐與席寶田等合力夾剿以期迅速會殲水師統領臬司劉于濤等均派飛刦上

駛護南贛鎮總兵普承忠亦抽隊前進計日內可陸續到齊會同
攻勦內閣侍讀銜前翰林院編修吳嘉賓因賊攻三都督團迎勦
力竭遇害殊堪憫惻可否仰懇 天恩飭部加等議卹准於殉難
地方建立祠宇以慰忠魂陣亡之擬保把總黃永全袁正泰並懇
飭部照把總例從優議卹 上諭議政王軍機大臣等沈葆楨所
奏南豐新城等處勦賊情形會國藩片內亦經陳及卽著該督撫
督飭席寶田劉勝祥等軍並精捷等營趕緊會合聚殲羣醜速將
南豐縣克復使賊前股不能立定巢穴則後股亦不得跟蹤上竄
不至勦辦又形棘手其徽浙之交會國藩與左宗棠所部節節布
置並著嚴密堵扼毋使羣賊再行越犯江境飽超一軍克復句容
後是否飭令進攻丹陽金陵一有可乘之機會國藩自當督令會
國荃激勵諸軍迅圖攻拔揜渠埽穴以成全功至會國藩奏以該

督所部各軍自聞截去江西釐金之信人心惶惑大局實虞決裂
恐致功虧一簣請將江西釐金仍歸該督經收以竟將藏之功自
係實在情形惟所稱沈葆楨截留釐金之奏並未與該督商酌詞
氣涉於激切鈔錄往來文函各件呈覽沈葆楨前因江西軍務緊
急懇請將該省牙釐茶稅等款仍歸該省經收支用如窒礙難行
請分提其半以應急需經部臣酌覈覆奏准其分提一半之請朝
廷亦因江西與金陵需餉同一緊急不能顧此失彼降旨准行嗣
因通政使王拯陳奏此事復經寄諭曾國藩沈葆楨等仍當同心
共濟以維全局而竟成功今曾國藩所奏既以江西釐稅一歸本
省經收恐致軍心惶惑著卽照所請江西省牙釐茶稅仍舊歸曾
國藩經收並准沈葆楨分提一半以爲本省防兵之用江西防兵
席寶田等軍卽毋庸會國藩再籌分濟此項釐稅本係曾國藩冊

立章程抽收有年若一改歸本省經收事屬紛更亦恐替換生手必致所收之數不能如前沈葆楨前奏未經先與會國藩商酌辦理似疑會國藩不允所商而然事屬因公各督撫臣同膺疆寄遇有交涉之件縱意見稍有不同亦應往復參酌以歸一是方爲同寅協恭之道若自恃因公而各執一是不肯相下則均屬非是朝廷本無所用其調停止恐該督等意見各存被左右所窺伺從中播弄貽誤事機屆時縱重治該督等之罪亦已無及此次所奏業經朝廷持平定議會國藩沈葆楨務各欽遵辦理毋得各存意見惟經手抽收釐稅之員必須廉明公正能知大體者方可派往著會國藩慎重選擇爲要本日總理各國事務衙門奏爲金陵見在攻剿得手公同設法籌濟餉需各摺片該衙門以金陵功在垂成而餉需短絀竭力籌濟以期迅速蕆事著卽照所請將該衙門總

稅務司赫德所呈上年奏撥輪船回國經費等項銀五十萬有奇
如果均係實存卽全數撥歸曾國藩軍營充餉又據聲稱此項內
有二十萬兩零本屬見存有著之款著李鴻章查明先行儘數撥
解曾國藩軍營該大臣亦可暫時以資散放以上銀兩如已起解
來京卽照該衙門所請作爲江皖鄰近各省前奉部撥解充京餉
之款並准於各該省將奉撥京餉照數劃抵撥解曾國藩軍營以
期簡捷其各該省應如何劃撥之處著李鴻章俟戶部覈定再行
諭知辦理此項銀兩係應解京師歸庫之款刻下部庫尙不免於
支絀京旗兵餉亦籌放時艱該衙門止以金陵一簣之功願全大
局先其所急以資轉注江西誼切輔車沈葆楨更當不分畛域均
勻協濟而曾國藩得此協餉尤當飭令曾國荃奮力圖功相機穩
慎進取激勵將士速奏膚功以副厚望將此由六百里各諭令知

之○以潘祖蔭爲左副都御史

由光祿寺卿遷

○予江西陣亡在籍翰林

院編修吳嘉賓祭葬世職建祠○壬戌諭議政王軍機大臣等前因多隆阿奏全陝回匪肅清所統全軍應赴援何省請旨遵行當經諭令多隆阿將所部不宜入甘之軍移剿陝南賊匪見在曹藍各逆勢尙猖獗劉蓉所部近日剿賊情形未據該撫馳奏實深廬念此股匪徒若不及早撲滅不獨興安商州等處受其蹂躪將來會合髮逆必致竄擾鄂豫腹地陝省回務旣已肅清多隆阿所部多係南人勢難進剿甘肅卽著多隆阿商同穆圖善於所部酌調兵勇四千名交姜玉順余福象統帶馳赴陝南會同劉蓉各營迅將藍曹各股匪徒盡力剿洗仍遵前旨追賊出陝行抵鄂境卽歸官文調遣並著官文將此起兵勇四千名催提赴鄂以資得力劉蓉務當激勵諸軍督飭李雲麟肅清漢南餘孽毋得任令盤踞蔓

延致負委任漢中一郡關繫緊要余福象係漢中鎮總兵如須畱兵彈壓自應令余福象酌帶親兵百數十人速赴本任其所帶之勇一併交姜玉順統帶並著劉蓉安籌調派擒匪張總愚一股竄擾盧氏勢將乘間西趨而陳大禧及漢南竄逆均聚內鄉勢將句合亟須一軍由陝省迎頭截擊並著多隆阿等速飭蕭河清孟宗福等酌帶四千入由雒南一帶確探賊蹤分投迎擊僧格林沁見已駐紮洛陽此軍即可催提赴豫歸僧格林沁調遣務期將張總愚等股迅速翦除蕭河清既帶兵剿賊潼關一帶應派何員帶兵駐守著多隆阿穆圖善劉蓉張集馨酌量調派穆圖善本係西安副都統省城根本重地不可無兵駐守多隆阿馬隊除酌畱四五百名交穆圖善統帶外其餘均著交蘇倫保常星阿溫德勒克西等分起管帶由陝赴豫遇賊即擊抵豫後一併歸僧格林沁調度

以一事權穆圖善畱省後著卽會同德興阿將存城之兵認真操演以備緩急其酌畱之馬隊四五百名並著穆圖善等隨時訓練如省城防兵已數分布卽著將此項馬隊派赴訥欽軍營以資攻剿前諭多隆阿選派得力之員前往訥欽軍營幫同帶兵可否於蘇倫保等數員中酌派一員前往著多隆阿穆圖善劉蓉張集馨妥商調派曹克忠一軍著暫畱陝省以爲遊擊之師張集馨仍將善後事宜妥爲布置並將省標兵弁勤加訓練以備不虞襄陽軍務緊要不可無大員總統屢經諭令官文嚴樹森酌定一人出省督師尙未據官文等覆奏其陳大澐見由老河口竄往何處陳德才等匪曾否與陳捻會合亦未據官文等馳陳西望不勝焦灼官文威望素著卽著該大臣剋日出省將襄樊等處水陸各軍力加整頓迅殄逆氛所有在事文武員弁如恒怯無能迎剿不力該大

臣務當從嚴參辦毋得諱飾瞻徇貽誤事機自取咎戾官文出省後省城防務嚴樹森責無旁貸並著認真經理期於有備無患不可稍涉大意多隆阿前次所保各員曾交軍機處存記該員弁等卽調往他省如續有功績仍當格外施恩甘肅回氛甚熾僅恃有雷正綰陶茂林等軍節節進剿著劉蓉迅卽酌量情形加兵力尙單卽仍遵前旨將該撫所部兵勇分撥數千名派得力大員統帶前往分路進剿以資接應正在寄諭間據穆圖善奏多隆阿傷病增劇勢甚危篤須重用護民以固其氣等語覽奏益深廬繫著發去人護六兩交該大臣祇領醫治安心調理用冀速痊另片奏連日據百姓報稱藍逆受傷十分沈重此股敗匪見趨甯陝圍與曹藍二逆合股匪數無多卽著劉蓉派兵截擊悉數殄除毋稍疏懈將此由六百里加緊諭知僧格林沁官文多隆阿穆圖善嚴樹森

劉蓉並傳諭張集馨知之○諭張集馨奏統兵大臣傷病難救謹
陳該營詳細情形密籌辦法與十九日寄諭多隆阿等諭旨大致
暗合本日已另降諭旨作爲特旨照所陳辦理矣該署撫請令姜
玉順余福象率諸將將四千人赴鄂惟余福象係漢中鎮實缺當
令赴任歸劉蓉節制以資鎮守所統親兵不得過多該處如須畱
兵防守劉蓉自能量爲調派姜玉順卽令帶兵四千名由子午谷
過甯陝將竄匪節節掃蕩迅至湖北交官文調遣蕭河清等卽令
率四千人由雒商進兵將盧靈關一帶西竄之匪迎頭截擊並會
同常星阿等各帶馬隊赴河南歸僧格林沁調遣已令僧格林沁
官文分別檄調至穆圖善係西安副都統應回本任並著畱馬隊
數百名在省令與德興阿將存城之兵認真訓練操防以備不虞
欽差大臣關防仍歸穆圖善暫署再降諭旨曹克忠卽令至盤屋

將來畱在西安附近該署撫當與之妥爲聯絡以資指臂之助當此主將創深軍情不靖誠恐一朝有變將士從而生心張集馨歷練有年務當不動聲色豫遏亂萌如多隆阿竟至不起該署撫或親往蓋屋拊循將士於應行辦理之事一面妥辦一面奏聞劉蓉見未到任該署撫責無旁貸務須籌策萬全以副委任正在寄諭間穆圖善奏多隆阿病勢危篤覽奏彌深廕繫著張集馨隨時探悉奏聞穆圖善另片奏藍逆傷重竄至甯陝圖與藍曹二逆合股等語張集馨卽飛檄姜玉順等將此股敗匪會合劉蓉所派之兵盡數殲除藍逆下落並著確探具奏○癸亥 萬壽節 上詣慈安皇太后 慈禧皇太后前行禮停止 升殿 御乾清宮王以下文武官員行慶賀禮自是每歲皆如之○諭議政王軍機大臣等前因總理各國事務衙門奏請將上年奏撥輪船經費銀五

十萬兩有奇全數撥歸曾國藩軍營充餉當經諭令李鴻章等將此項內有著之款二十萬兩零先行儘數解赴曾國藩軍營如已起解來京卽於鄰近各省奉撥京餉項下劃抵撥解其如何劃撥之處俟戶部覈定再行諭知辦理茲據戶部片奏曾國藩營餉除湖南等省應協之餉仍令照常協解外所有此項輪船餘款等銀兩先經總理衙門札飭解部見在奏充曾國藩軍餉如未起解北上應由李鴻章迅速委員分批解往如已起解卽責成李鴻章分晰奏明再由該部查照總理衙門原奏將原撥江皖鄰近各省解部京餉照數劃出飭令就近解交等語著李鴻章按照該部所奏將見存未解之輪船經費儘數先解曾國藩軍營如已起解來京卽將所解關平規平各銀兩及洋銀一款統合共庫平若干兩迅速分晰奏明由戶部查照將原撥江皖鄰近各省解部京餉照數

劃出就近撥解曾國藩軍營以資應用曾國藩一面傳知各營俾各奮勉圖功一面催提此項未解之銀將月餉散放以收飽騰之益而竟垂成之功沈葆楨當懷遵前旨將江西牙釐稅項仍歸曾國藩經收江西分提一半以濟本省之用至江海關零稅一款究係何項稅銀並著李鴻章查明報部將此由六百里各諭令知之○僧格林沁奏臣督軍馳至宜陽暫紮調提督傅振邦自南陽帶領步隊駐紮嵩縣以扼東路飭蘇克金帶領馬隊仍紮南陽以防南面並令總兵張曜自西路進兵偪賊出險復將臣所帶步隊兵勇一千名撥往嵩縣歸傅振邦調遣自東路黑峪進兵卽飭該提督統帶其張曜等軍俱歸調遣以一事權旋據張曜等稟報該逆於欒川迤西山口修築四壘挑挖長溝阻我兵路該總兵連日進攻斃賊多名十五日督率副將尹嘉賓等奮勇進攻破其兩壘斃

賊無算是夜該匪遺棄輜重向南翻山越嶺由大坪頭一帶狂奔逃竄該處由二郎坪可通內鄉鎮平南陽之路張曜見已督兵追剿並酌留數營暫駐樂川防剿朱陽關髮逆等情臣復飭傅振邦督同張曜等軍實力追剿儻該逆被剿窮蹙竄出山險卽係內鄉鎮平一帶復札令蘇克金整軍以待一至平闊地方卽行截擊見在北面情形稍鬆臣卽於十九日督軍進紮嵩縣以便相機策應

上諭張總愚股匪盤踞盧氏縣之樂川經張曜尹嘉賓等帶領兵勇連日進攻該匪越嶺南趨由大坪頭一帶狂奔竄亟宜跟蹤追剿該大臣見已前紮嵩縣著卽飭令傅振邦督同張曜等軍奮力追擊偪賊出險蘇克金所部馬隊見紮南陽俟該逆竄出山險卽令由南面迎頭截剿以期盡殲醜類並著張之萬嚴飭南陽鎮府率領在防兵勇會同蘇克金迅速兜剿毋任紛竄他境致滋蔓延

前據張之萬奏陳大澹一股回竄浙川之李官橋襄陽之老河口漢中髮逆竄往內鄉之下瓦亭相距甚近曾否句合著僧格林沁張之萬派兵分投堵擊迅速殲滅勿令句結束趨擾及腹地昨日諭調多隆阿所部蕭河清孟宗福蘇倫保常星阿溫德勒克西等各帶步隊兵勇共四千名馬隊除酌留西安四五百外約有千名分起由陝赴豫著僧格林沁迅速催提前進以資攻剿將此因六百里各諭令知之○諭徐宗幹奏閩省籌辦防堵情形一摺皖南賊匪由浙入江復由江西之玉山等縣分股四出擾及崇安相近之黃公橋等處經遊擊劉朝太等督團截剿小有斬擒該逆旋由鉛山竄往弋陽等處前據沈葆楨奏賊竄南豐新城已諭令該撫等嚴密防剿江西辦理軍務尙屬認真該匪窮無復之必圖擾及鄰境新城與光澤邵武等處均屬毗連徐宗幹見派已革參將蔡

潤澤等帶領兵勇赴浦城之二渡關等處扼防道員陳維漢等防
光澤邵武等處布置均尙周密著卽督飭在事各員勤加偵探擇
要防守遇賊卽擊毋令入境滋擾並令地方文武聯絡紳團輔助
官兵以收眾志成城之效如其賊蹤竄越邊防緊急卽著徐宗幹
相機出省督剿浙省軍務漸平左宗棠身任兼圻自應力圖兼顧
能否撥兵助防並著酌量辦理張運蘭屢經有旨飭催赴任著徐
宗幹迅卽咨行毛鴻賓催令帶勇啟程英桂簡任福州將軍爲日
已久見在因病請假數日著俟假滿卽行啟程赴閩與徐宗幹會
商辦理以期格外周妥將此由六百里各諭令知之○乙丑諭議
政王軍機大臣等富明阿奏官軍連敗丹陽援賊添兵渡江並水
師剿賊情形一摺與馮子材等前奏情形大略相同見在賊勢尙
眾復於黃墟村一帶搶築賊壘五座意圖牽掣官軍阻遏進攻之

路富明阿見已添調總兵楊心純等勇丁九百名渡江助剿著卽飭令詹啟綸等聯絡鎮江各營速將賊壘掃除以期會攻丹陽至鎮江之師前已將丹陽湖埂逆壘攻克進逼西門著馮子材魁玉卽嚴督張文德等前敵各營會合揚防援師互相策應一面聯絡鮑超所部諸軍迅將丹陽城池攻拔毋稍遲緩沿江一帶屢有逆匪出竄並有大股欲由江干紮壘爲竄渡太平洲之地經揚防水師擊敗其竄往恤陵沙武家橋等處之賊亦經師船迎擊轟斃甚眾見在沿江下游之賊旣併竄上游太平洲江面又極狹窄尤須防其搶渡北岸富明阿已飭吳全美酌撥師船添赴上游堵剿著卽嚴督水師各營將士梭織巡防毋任該匪於太平洲偷築營壘致剿辦又形費手江蘇釐局應如何歸併裁撤之處著富明阿會同吳棠李鴻章力行整頓務將積弊訪查明確奏明覈實辦理將

此由六百里各諭令知之○諭多隆阿奏擒斬首逆並該大臣養傷情形各摺片藍大順由盤屋逃出負創甚重沿途裹脅二三百人意圖徑竄甯陝與曹逆等合股經佛坪團練擊斃二百餘人復經漢陰廳紳士管芳等在該處齊團邀截立將藍大順殲斃並將逆黨王老么等擒獲實足以快人心該逆餘黨仍恐復有漏網著多隆阿檄飭將士嚴行按捕毋任一名免脫該大臣在營調理傷病連服葢芪漸有轉機覽奏稍紓厯繫前經頒給人葢六兩諒已遞到著卽安心靜攝以冀速痊將此由四百里諭令知之○調吉林黑龍江兵各一千名益富明阿軍○飭四川等省撥解慶陽軍餉○予江南陣亡委參領圖普新祭葬世職○丙寅左宗棠奏杭州餘杭兩城經官軍攻克後逆賊一趨武康一趨德清臣以武康德清爲湖州屏蔽石門爲通杭湖要道必先克此三城而後可進

圖湖郡當飭楊昌濬督率各營由瓶窯安溪關進規武康飭蔣益
澧分軍進規石門德清飭李耀南等馬步七營出孝豐武康之間
截勦竄賊楊昌濬等疊破箠頭上陌各賊卡進攻武康縣城先是
武康逆目吳開俊曾遣人通款於羅大春約爲內應楊昌濬令羅
大春率所部先進曉以禍福一面飭余萃隆等各率所部駐上陌
偏之時陳逆炳汶汪逆海洋及侍輔利來各賊酋麇聚德清賊眾
不下十數萬三月初一夜張聲恆密遣降人乘夜潛入賊中燒毀
賊營賊館數處羣賊驚擾達旦初三日紛紛由德清遁入武康羅
大春率親兵遇賊於黃洞橋殺賊數十名溺死無算立將黃洞橋
拆毀連夜各營分伏武康城邊用火器攻擊城賊大震降人楊芸
桂等約爲內應初四日羅大春等薄城環攻逆首吳海勝憑卡抵
拒楊芸桂等開門迎納官軍吳海勝棄卡逃遁羅大春等一面入

城一面分兵追剿直抵三橋埠適德清之賊大股擁至吳海勝復率眾回鬪官軍扼橋抵禦排礮轟擊斃賊數百名賊始敗走立復武康縣城其德清一路經蔣益澧令高連陞王月亮兩軍進駐上七鋪地方探悉陳汪二逆將由德清竄走侍逆殿後初五日高連陞馳抵城西見城賊開門逃竄高連陞等策馬衝入詎街巷破屋中伏賊突起出城之賊仍折回抗拒高連陞等併力猛攻自辰至未塵戰四時之久城賊洵懼棄城而遁官軍分路追殺擒斬悍賊數百名奪獲大小船隻數十號當將德清縣城克復蔣益澧復飭李邦達等進逼石門踞逆鄧洸明出城乞降初五日將縣城收復臣與蔣益澧提訊鄧洸明據供罪民久已蓄意投誠因爲陳炳汶所偏不能猝脫見惟束身歸命以俟刑誅臣見其左手已廢尫瘠特甚縱令乞降非眞抑亦殺之不武旣不忍以其求生而置之死

傷朝廷好生之仁更不敢因前奏該逆業已陣斃稍涉回護因傳令免死令挑其黨之悍者分爲數營隨同進剿以規湖郡其先竄德清之僞利王僞來王一股繞出武康之西圖竄孝豐初五日李耀南等督率各營出獐頭陣截擊該逆急向荻浦竄去正追殺間陳炳汶一股續又竄至聶邦光率隊從旁殺出斃賊數百名賊勢大潰利逆率眾回援劉明燈等馳至夾擊又斃賊數百餘逆棄械狂奔官軍乘勢追殺斃賊無算拔出難民數千該逆經官軍疊次痛剿人心渙散李侍賢楊輔青陳炳汶等逆圖分路以竄廣德孝豐黃汶金李遠繼等逆圖守湖郡及見官軍逼近李繼遠又欲由吉安以竄甯國初八日高連陞等乘賊勢紛亂率師急進行至離湖州四十里地方遇賊隊蠡擁而來縱兵大擊斃賊數千名焚燒賊船千餘號羣賊望風潰竄頃據探報前由孝豐竄去賊股已繞

從千秋關太陽埠竄至昌化縣境

臣

前因蘇皖諸賊麕聚湖州卽

慮突犯上游擾我完善當飭分水新城嚴州遂安各處守軍嚴防

並調康國器張聲恆兩軍赴臨安截剿見在賊旣悉由廣德孝豐

上竄嚴遂之防尤爲緊要

臣

又加派劉清亮各軍由新城赴嚴州

唐學發等營水師於桐嚴一帶梭巡各軍若前後夾擊或可聚而

殲旃卽有漏網他竄

臣

當督飭各軍出境追剿務將此股肅清此

次尤爲出力各員謹先行開列懇請分別獎勵其餘出力員弁可

否由

臣

存記俟克復湖州彙案保獎出自

天恩又奏

臣

於三月

初二日進駐省垣巡視各城垛身間有轟塌之處尙易修葺惟駐

防城身概行拆卸房屋但存牆壁省城以內倉庫衙署蕩然無存

街市房屋大半拆毀存畱遺民及陸續來歸者合計不過數萬口

見已遴派官紳設立賑撫局收養難民掩埋屍骸並一面招商開

市一面將急須修濬工程辦理以期通商惠工暫救時局其餘善後事宜容再次第籌辦 上諭議政王軍機大臣等官軍克復武康德清石門三縣自可乘勢進取湖州惟賊酋李侍賢楊輔青陳炳汶李遠繼窮無所之希圖突犯上游擾及完善左宗棠見調康國器張聲恆兩軍赴臨安截剿並派劉清亮各軍由新城馳赴嚴州防剿唐學發彭大光督帶水師於桐嚴一帶梭巡布置尙屬周妥卽著嚴飭水陸各軍前截後追乘該匪喘息未定聚而殲旃不至漏網他竄方爲妥善江忠朝曾否已抵江省陳鳴志等所統江忠義舊部見紮何處著沈葆楨酌度機宜或卽派此軍赴江西浙江毗連處所扼要駐紮以杜該匪上竄之路如已乘間闖入江境卽著左宗棠檄飭諸軍迅速越境追剿務將此股竄匪悉數殲除俾江省得以悉力南豐新城肅清腹地高連陞等率師進趨湖郡

離郡城四十里地方擊賊獲勝羣賊望風潰竄此時計已緊逼城下官軍自必倍加奮勇左宗棠卽當乘機鼓舞令其迅拔堅城廓清全浙前因嘉興克復諭令李鴻章督率李朝斌等會同浙軍設法進取湖州見在浙軍業已前進並著李鴻章分兵會剿兩路夾擊用收速效該撫派兵援浙向能不分畛域此時機有可乘尤當激勵軍士協力兜剿以竟前功見派何將何營會剿湖郡之處著李鴻章迅速奏聞廣德甯國一帶係湖賊出竄要衝李侍賢等見又有圖竄廣德等處之議該處防剿正緊會國藩前有會同浙師在徽浙之交節節布置之奏刻下廣德甯國等城防兵是否足資分布著該大臣妥籌調派務將廣德甯國一帶賊竄之路嚴密堵截毋稍大意致羣賊續犯江西又成不了之局鄧洸明束身待罪左宗棠見其左手已廢尪瘠特甚准暫免一死辦理自屬正大所

部悍黨見經分爲數營隨赴湖州攻剿並著左宗棠密飭湖州各營將領隨時加意防範毋令別滋事端江西大兵雲集所有竄踞南豐蔓延新城之賊著沈葆楨激勵將士痛加剿洗務使前竄股匪盡皆殄滅庶後股不敢接踵而來於東南全局大有裨益左宗棠另片奏進駐省垣籌辦善後事宜等語杭州兩次淪陷被禍尤酷存畱遺民及陸續逃歸者合計不過數萬覽奏曷勝矜憫左宗棠見已設局賑撫收養難民並將善後各事宜逐一興辦卽著督飭在事官紳認真經理不可有名無實前據左宗棠奏訪查前署布政使麟趾湖州府知府瑞春均於城陷時殉難諭令將該員等死事情形查奏此時杭州已復著左宗棠卽將麟趾殉難詳細情形及道員遲福有無下落一併查明據實奏聞知府瑞春著俟克復湖州後再行確查具奏將此由六百里各諭令知之○諭劉蓉

奏官軍追剿曹藍各逆獲勝一摺另片奏團勇擒斬藍逆全股撲滅等語曹逆燦章與洋縣餘黨竄合游弋於佛坪之松花坪等處經劉蓉派令彝字營折往追剿沿途剿洗賊壘平毀賊巢多處追至洵陽壩該逆步隊連夜由腰竹溝楊泗廟小路奔竄盤屋克後藍逆潰圍分起由新口峪奔板房子圖竄金雞兩河與曹逆餘黨合股經黃鼎等設伏邀擊因夜雨未能窮追藍逆帶傷逃遁旋竄紫溪河地方經在籍主事管湧率團勇擒獲首逆藍朝璧並殲斃僞統領林姓等多名辦理均尙得力藍逆是否正身仍著劉蓉查明具奏藍曹餘逆竄入北山該處林深箐密路徑紛歧若不趕緊撲滅恐致復釀燎原之患該撫已派蕭慶高等就甯陝鎮安一帶分路接捕並派廖溥明前往誘降著卽飭令迅速妥辦曹燦章一犯務須擒獲勿任漏網蔡逆竄擾蜀河恐爲川邊之患著李雲麟

會同湘果各軍剋日掃蕩並著劉蓉督飭該京卿妥爲辦理以期早日奏功多隆阿受傷並未回省仍在整屋養病劉蓉欲赴西安與多隆阿籌商剿回事宜卽著酌量辦理並仍趕緊赴潼關一帶妥籌防剿陝西邊患方亟羣賊如毛奔竄靡定該撫當慎以圖之切不可自鳴得意致負委任將此由六百里各諭令知之○丁卯諭議政王軍機大臣等官文等奏捻逆兩次圖踞襄樊官軍援剿獲勝一招襄樊爲形勢之地久爲羣寇垂涎此次捻逆陳大澂等由棗而西力爭上游其勢甚熾幸成大吉梁洪勝等軍援剿獲勝襄樊賴以復安惟敗捻西趨老河口而漢南髮逆已竄至鄧州之厚坡將與陳大澂一股會合後股竄至雒南又將與竄往嵩盧之張總愚捻逆合股楚豫各邊千有餘里數十萬之賊麇聚其間防務萬分喫重官文等見派水陸防兵嚴防上游要隘並於下游黃

同等處相機扼堵所籌均尙周密第賊勢正盛而官軍分布各處
必須總統有人方能事權歸一著官文恪遵疊次諭旨卽日出省
督師分飭各路將士將西趨老河口捻股乘勝剿滅並偵探髮逆
蹤迹迎頭截擊毋令與捻匪勾結蔓延爲患嚴樹森居守省垣務
將漢黃一帶防守先事豫籌督飭水陸各營嚴密防範毋稍疏虞
僧格林沁前已移軍嵩縣計張總愚一股不難剋日殄除惟髮逆
頭起竄擾鄧州境內其後股又竄雒南必須痛加剿洗方能遏其
兇鋒不至竄擾腹地著僧格林沁會同張之萬督飭南路各軍與
楚師兩路夾擊速殄賊氛前諭將多隆阿軍營馬步各隊約共五
千餘名調赴僧格林沁軍營此時勦辦大隊捻逆正宜厚集兵力
仍著僧格林沁將此項馬隊兵勇迅速催提赴豫漢南剿賊之姜
玉順一軍四千名並著官文迅速飛調赴楚藉資策應將此由六

百里各諭令知之○廣江西南昌府學額五名撫州四名崇仁縣
十名豐城五名湖北興國沔陽荊門咸甯漢陽江陵各四名蒲圻
崇陽孝感蘄水鍾祥監利各三名武昌漢川黃陂黃岡麻城京山
天門應城松滋宜城南漳當陽各二名江夏嘉魚通城大冶黃安
羅田廣濟潛江安陸公安棗陽東湖長樂恩施遠安各一名○予
湖北陣亡遊擊朱心俊等祭葬世職入祀昭忠祠○戊辰諭議政
王軍機大臣等李雲麟奏首逆伏誅餘黨剿盡通籌見在情形次
第追剿各摺片所陳主事管滂率領國勇於紫溪河地方合剿藍
逆股匪殲除匪首等情與前日劉蓉所奏略同而管滂等由規溝
場追賊餘黨及之於葉家坪與舉人張承燮等團勇相遇併力夾
擊將賊餘黨全行殄滅並軍功王重良率勇按尋藍大順正身並
其偽巡部藍三順四順等八人同時殺斃等情較劉蓉前奏爲詳

劉蓉前奏本有先於紫溪河殲斃眼有肉瘤之藍大順外間傳說並非該逆正身之語茲據李雲麟奏據獲賊供係屬僞都統王包包假名此次王重良所殺藍逆正身割驗首級實屬確切當爲可信主事管滂及張承燮王重良等帶圍剿賊殲斃賊首自應量予獎敘惟據李雲麟奏稱管滂蔣常垣二員前經劉蓉保獎之處均與新例不符應行改正著劉蓉將李雲麟此次所保之管滂等各員獎敘並管滂蔣常垣前保應如何改正一併覆覈擬定具奏再降諭旨前諭令李雲麟會同湘果各軍速剿禁逆股匪今該京堂所奏既以痛剿此賊自任劉蓉仍遵前旨督飭迅速掃蕩藍曹餘孽竄入北山並飭蕭慶高等軍趕緊剿滅毋任深入林箐日久蔓延致成棘手何勝必駐軍興安防賊回竄自可與蕭慶高湘果各軍相爲策應其主簿李百魁所部各營將已抵商卽當與藍斯明

一軍合力追剿東竄逆股至李雲麟所稱多隆阿見又派兵三千赴商會剿是否卽姜玉順等所帶之兵抑係另有派往何項官軍均卽督令會合藍斯明等迅將竄賊併力痛剿以絕延蔓將此由六百里各諭令知之○毛鴻賓奏探報金陵逆賊僞侍王李侍賢分大股上竄其前隊廣東花旗股匪已由浙繞越江西之廣豐玉山漸及撫州建昌地界獲賊供稱該逆有回竄粵東之意查咸豐六年廣東紅匪大股數十萬人竄擾吉安等處會石達開至臨江句結其眾另編花旗股匪肆擾多年其黨與散歸者亦數萬人時虞蠢動前聞侍輔諸逆有由福建江西回竄廣東之說臣前度該逆乘間上竄爲浙蘇皖之軍偏剿窮蹙糧道漸斷必分股肆擾出險求生以冀掣動官軍進規杭湖之勢以大勢論之江楚當防其竄擾未必遽及廣東及聞侍逆大隊爲浙師所截獨花旗及沛逆

一股裹糧疾馳先期竄入江境是此股賊匪本無定向又非若侍
輔諸逆與金陵有互相維繫之心其回竄廣東勾結黨與以圖一
逞亦情勢所應有粵東伏莽徧地尤易勾結蔓延不可不早爲之
備見在足備堵剿者僅有張運蘭所部湘勇三千人臣見飭移紮
南雄州探明賊蹤相機辦理兼顧韶南一帶邊防如賊已占踞城
邑卽當越境助剿以期聚殲復飭知府劉德謙管帶信字營移紮
樂昌以資鎮壓仍飭添募楚勇三千人期與張運蘭一軍相爲犄
角以厚兵力其嘉應州一路毗連福建江西兩省道路紛歧擬飭
副將方耀挑選所部潮勇三千名駐紮鎮平兼顧平遠大埔邊防
見准閩浙督臣左宗棠來咨飭令張運蘭挑選所部二三千人馳
赴福建臬司本任臣查廣東見存兵勇均不得力此時張運蘭一
軍未可輕離粵境如探明撫建一帶官兵可以合圍環攻杜其四

竄卽當飭令張運蘭酌量會剿顧全大局 上諭卓興之軍追剿陽江等屬分竄客匪疊有殲擒並將匪首曾白面豬擒獲而餘匪尙復分竄信宜東安所屬各地信宜久爲賊擾之區甫經戢事斷不可令賊再行煽亂東安富霖洞新甯天堂墟地勢如何粵地率多山險尤不准任賊久踞又成負嵎致滋棘手卽著毛鴻賓郭嵩燾督飭卓興及侯勉忠等各軍實力進剿痛殲醜類客匪與逆匪究屬不同其應如何剿撫兼施妥爲安插總期畏威懷德得以一勞永逸彌其毀隙免滋事端方爲妥善其由皖南竄越江西逆黨早有由新城等處闖越閩境光邵一帶者並有欲回竄粵東之說不可不豫爲之防前據左宗棠奏請飭令福建臬司張運蘭一軍前赴本任以資防剿節經諭令毛鴻賓等遵照辦理茲據奏稱張運蘭一軍此時不可輕離粵境並據陳見令知府劉德謙添募楚

勇各情朝廷不爲遙制第張運蘭旣不能卽赴任而閩省防剿亟須豫爲籌布著左宗棠徐宗幹催督曾元福內渡之軍迅移得勝勁旅回顧腹區以資調遣由江竄閩賊勢如何並著隨時馳奏張運蘭之軍馳往英德於該處零星股匪自當迅速掃蕩劉德謙楚勇卽准其添募與爲犄角速將各處伏匪剪除嚴布粵東毗連江閩邊境以防逆匪回竄其南韶與嘉潮兩路均屬不可大意而嘉潮民俗尤悍逆匪由閩之邵汀一路奔趨路尤徑捷且恐其黨與散歸者於該處爲多張運蘭如移紮此路相機堵剿於閩省較爲聲息易通卽以劉德謙新募楚勇專防南韶亦覺便捷應卽如何辦理之處著毛鴻賓等妥籌辦理該督旣稱潮勇多不可靠其方耀所部駐紮鎮平以顧嘉應一路是否合宜並著毛鴻賓妥籌調度毋稍疏虞將此由六百里各諭令知之○武蔚文以病免以唐

訓方署湖北按察使

候補布政使

○己巳李鴻章奏遇缺提奏提督江

西南鎮總兵程學啟前攻嘉興府城槍子貫入頭腦既絕復甦

回營醫治進藥數劑言語神氣稍爲清楚

臣

於三月初二日出省

赴楊庫督剿復往看視程學啟言賊雖潰敗勢悍且眾請飭諸將

慎重兜擊又言人才難得恨將死不能爲國家驅除殘寇輒哽咽

流涕向

臣

太息

臣

猶勉以安心調治並屬地方官時往照料迨

臣

追賊至青陽忽接省信以程學啟日漸危篤傷處成洞時有髓流

火毒貫喉六日滴水不入惟神志尙清初九日屬家丁爲穿御

賞黃馬褂望闕叩頭旋繞室行走數步見案上有茶舉杯至口不

能下咽悽然淚下並令其營務處知縣韓杰馳赴

臣

處屬專心剿

賊不及等候回省語不及私臨絕時大呼心事未了

聖恩未報

腦漿迸流當於初十日子刻出缺臬司郭柏蔭督同府縣親視含

斂料理後事臣適行抵常州接信不勝悲悼各營將士慟哭失聲
江浙遠近官紳士民無不同聲呼愴查程學啟籍隸安徽桐城遭
亂被擄陳逆四眼狗欲重用之程學啟嘗自逃去爲賊追回拘繫
不得脫咸豐十一年四月間今浙江撫臣曾國荃督軍進逼安慶
程學啟密赴曾貞幹營中納款曾國荃兄弟見其志趣忠勇迥異
尋常遂畱營帶隊旋克復安慶省城程學啟之功居多臣奉命赴
滬卽帶程學啟所部兩營東來五月虹橋之捷八月北新涇之捷
十月四江口之捷皆殺賊近萬大挫兇鋒實賴程學啟多謀善戰
以少擊眾臣因爲程學啟陸續增募至萬餘人部勒嚴整所向克
捷先後克復青浦嘉定太倉鎮洋崑山新陽吳江震澤各州縣二
年七月進逼蘇城程學啟以水陸一萬人由婁門外跨塘逐漸進
剿苦心經營將城東之寶帶橋五龍橋城北之蠡口黃埭城西之

許關虎邱各處石卡賊壘次第埽平又兩次遠剿嘉興援賊於八
坼平望一帶助剿忠逆大股援賊於大橋角望亭一帶分剿湖州
援賊於太湖東山一帶出奇入險賊中怖爲神兵洋槍炸礮爲攻
戰利器程學啟隨臣入滬畱心講求晝夜研究去冬克平望堅城
今春轟嘉興名郡臣購覓大洋礮三尊交給演放竟能指揮如意
功效疊著其深心遠略謀勇精勤設使天假之年功業詎止於此
今年甫三十五歲遽因攻克嘉興隕身鋒鏑每念時事多艱將才
不易臣誠私心痛之程學啟無子以嫡姪建勳爲後年尙幼小念
其攻克安慶後兩年之間連復江浙名城十數處並克復蘇州省
城似爲東南第一戰功可否仰祈飭部准照提督陣亡例從優議
卹並加恩予謚宣付國史館立傳並於安慶蘇州嘉興各府建立
專祠以彰忠藎 上諭內閣遇缺提奏提督江西南贛鎮總兵程

學啟由安慶來歸帶隊攻克皖城上年復隨李鴻章督兵由滬赴蘇所向無敵兩年之間先後克復蘇州省城嘉興府城及江浙名城十數處實爲東南戰功稱最朝廷見其謀勇兼優勲勞卓著疊擢提鎮賞給世職殊恩異數屢錫褒嘉乃於本年攻克嘉興時該提督躬冒矢石首先登城致槍子貫腦絕而復蘇屢經降旨詢問病狀方冀安心調治就痊重資任使詎意竟因傷重出缺將才難得悼惜殊深程學啟著追贈太子太保銜照提督陣亡例從優賜卹任內一切處分悉予開復加恩予諡入祀昭忠祠所有戰績及死事情形宣付國史館立傳並於安慶蘇州嘉興各府城建立專祠靈樞回籍地方官妥爲照料並著李鴻章酌派司道大員前往賜祭一壇伊子程建勲著俟及歲時帶領引見候旨施恩用示眷念勲勞優加褒卹之至意尋予祭葬加三等輕車都尉世職諡忠

烈○諭前因前任漕運總督袁甲三在陳州防所積勞病故當經降旨從優賜卹嗣因官文之請復准在陳州府地方建立專祠茲據喬松年奏稱鳳陽府紳民稟請在臨淮建立袁甲三專祠除批准外附片陳明等語袁甲三從前統軍淮甸克復鳳陽府縣各城功績卓著至今遺愛在民允宜俯如所請准在臨淮地方建立專祠以順輿情惟以統兵大員生著勳勞歿膺廟祀係朝廷曠典豈臣下所得專擅喬松年既據紳民呈請自應據情上達候旨遵行乃未經奏明先行批准片內並無可否請旨字樣殊屬躐率喬松年著傳旨申飭○李鴻章奏臣於三月初十日由青陽行抵常州十四日徧察城西賊營橫亘二十餘里分爲兩路一當西北通丹陽一當西南通金壇中夾運河左右環紮形如列星訊據逃賊供稱踞逆偽設王陳坤書所部人眾數萬蘇錫宜溧敗賊併歸常州

又添數萬見城內外眾尙十萬惟兩廣悍黨尤多因溧陽路斷丹陽金壇又有官兵圍攻無路可竄城中糧食尙支四五月護逆決志死守待援等語臣飭劉銘傳由北門先攻西北遠處賊營破其一座乘勢進攻新牖三營用炸礮轟坍營牆數丈劉銘傳親督將士大呼齊進立將踞賊七百餘人圍殺淨盡護逆率眾渡河來援將過浮橋賊壘已破黃翼升劉銘傳乘賊半渡揮眾迎擊賊匪落水死者千餘人南岸頭營二座亦卽潰退十七日臣先令王東華帶水師三營由隔湖萬年橋進擊郭松林楊鼎勳合攻陣渡橋大石壘復調程學啟礮隊協攻自辰至午壘賊死守兼拒楊鼎勳親率將士奮呼殺入郭松林帶隊填濠而進令易用剛繞堵賊壘後門賊屢衝不出悉數擒斬迤南三營相繼潰走郭松林督軍追殺連踏賊壘六七座鄭國魁築營新牖賊隊隔河相拒劉銘傳分搭

浮橋過河猛追賊不能支王東華礮船適由三河口衝出軍勢正合臣與李鶴章飛調周盛波等折回向西北與劉銘傳前後夾擊賊眾緣河狂奔自相蹂踐死者甚眾王萬釗曾明魁以槍礮排擊斃賊無數有廣賊數千同戈迎戰郭松林等縱橫衝殺擊斃二千餘人又踏平沿河賊營二十餘座鄭國魁張桂芳卽扼紮河北高壘三座郭松林楊鼎勳扼紮河南堅壘五座於是丹陽金壇兩路俱斷祇西門城根尙有賊營六座緊護城根小南門尙有賊壘一座土營兩座十八日張樹聲周盛波合攻小南門賊營劉銘傳郭松林合攻西門賊營羅榮光用炸礮轟倒小南門橋上石卡周盛傳乘勢攻奪土營及石營之賊皆潰我軍搃斬多名張樹聲復督隊向西門追擊賊方踞高阜拒戰張樹珊等直衝而入繞出賊後賊眾駭奔張樹聲乘勢攻奪一營殺斃悍賊數百名郭松林劉銘

傳等由西北兩路夾攻復踏毀靠城賊營三座其西北城角兩營亦卽潰退時護逆在西門城頭見各營不守立將城門堵塞營中潰賊多係兩廣悍眾盡向城根奔竄各軍三面擠殺填屍盈河所有城外賊營數十座一律掃平我軍分壘屯駐長圍已合戈登屢請帶隊協剿常州臣准令前來適於十八日趕到西門正我軍合力攻營之候亦以炸礮助剿查蘇省賊眾屢敗併聚金陵常州兩城拌死鋌險互爲犄角若任其他竄必貽鄰省無窮之憂茲因嘉興克復湖州之賊全數上竄蘇省東南防務稍鬆自應併力常郡設法攻城臣飛調劉士奇王永勝帶五營行隊用程學啟攻嘉興巨礮分攻正南門小南門令劉銘傳炸礮隊攻北門郭松林攻西門張樹聲攻東門約期並舉惟常城係各路敗賊精銳所集約有十萬其兩廣悍眾積年死黨一旦窮蹙無歸勢必拌死拒守爲萬

死一生之計臣惟設法招撫一面開礮轟擊脅以兵威仍離其眾
心相機妥慎籌辦馮子材魁玉奏丹陽逆匪自西路被劫後援賊
屯聚東北聯營築壘悉力相持三月十九日大股悍賊先後圍撲
遊擊胡世英等前敵各營總兵詹啟綸督飭所部開放槍礮疊殲
前鋒逆目多名賊始敗退我軍仍由黃墟禹王廟一帶進逼臣等
因羣逆趨重東北勢漸蔓延慮其闖入新豐鈔截官兵後路二十
一日臣馮子材率親軍小隊馳赴新豐察看東北一路逆巢聯築
九壘餘皆沿村包紮縣互十餘里因屬詹啟綸相機堵剿隨由張
官渡過河自北門至西路查看總兵張文德各營是夜卽派勇五
成疾擣西門並攻剿十里牌逆壘以牽綴東路之賊竟夕環攻擊
斃守垛之賊無數旋聞金壇之賊紛紛外竄提臣鮑超紮營西洋
截殺甚眾查金邑旣下丹陽各逆聞風喪膽亟應乘機規復當派

各營於二十二日徑擣西南兩門暨附城逆壘副將楊青山等分三路齊發副將汪柱元帶隊策應一面函令詹啟綸同時大舉楊青山等銜枚疾走直薄城根賊於城上開放大礮我軍奮力攻擊槍礮環施焚毀附城逆卡數處殺賊甚多時詹啟綸派馬步各營直撲黃墟一路逆壘賊見西路攻城甚急未敢離巢抗拒我軍四面兜剿斬馘無算當將該處逆巢九座全行奪毀仍飭詹啟綸張文德等乘此聲威迅圖攻克至鎮城根本重地當此逆氛潰竄尤當加意防維臣卽日回城督飭畱守各營晝夜梭巡未敢稍涉大意上諭議政王軍機大臣等李鴻章親督將士兜剿江陰東南竄賊殲除殆盡旋由青陽赴常督籌攻剿將城西南門外賊營數十座全行踏毀官軍分壘屯駐業已四面合圍諸軍連日倍加奮力踴躍用命甚屬可嘉惟城賊陳坤書與各路敗賊所餘驍悍麇

集其中且多兩廣積年頑惡死黨勢必拌命死拒此時官軍長圍已合賊之飛走路窮諒不復能鋌而出竄李鴻章仍當穩慎圖功以策萬全該撫所調劉士奇王永勝帶五營行隊與戈登等分攻各門是否能相浹洽俾資其力著隨時妥爲駕馭該撫摺內所稱湖州之賊全數上竄究係竄往何處湖州曾否收復李鴻章如果探實卽先行馳奏馮子材等所奏鎮揚各軍會剿丹陽城援各逆屢有殲截丹陽之賊內衝外撲其氛甚惡而詹啟綸等各營均能持重堅定復經馮子材親往西北各路察看布置飭令各軍聯絡堵剿奪毀賊之附城營卡並據探聞金壇賊已紛紛外竄鮑超紮營西洋大加截殺是金壇一城已爲鮑超攻拔丹賊更必聞風喪膽著曾國藩卽飭該提督迅移金邑得勝之兵與鎮揚各軍會攻丹陽以期速拔則兩邑連下常賊之勢益孤攻剿更必得手馮子

材以鎮防緊要於各路布置釐定旋即回城著仍嚴密周防以備賊氛潰逸毋稍大意將此由六百里各諭令知之○諭文祥奏查辦墾荒開渠大槩情形並郡王伯錫爾捐辦渠工暨哈密虧短鉛丸軍械各摺片哈密地方籌辦開墾地畝經文祥先赴東路塔爾納沁蔡巴什湖兩處查勘除原額屯地外沁屯共得荒地五千六百六十畝蔡屯共得荒地一千七百餘畝均可開墾惟患水利不足文祥見擬將老渠挑挖子渠加濬寬深使水流通暢藉資灌溉並首先倡率設法勸捐以濟工需著卽照所擬辦理所有按戶升科一切事宜並著詳細安定章程以期經久其西路一帶查有蕭爾齊火石鐵岡茨梅花湖三段荒地均皆肥沃擬將北山五道溝水源開渠引水澆灌此項工費浩繁籌辦不易該回子郡王伯錫爾見願自雇夫工捐備口糧木料設法開挖渠道情詞出於至誠

殊堪嘉尚著文祥卽會同伯錫爾妥籌商辦俟將來工竣時由文祥奏請獎敘至哈密庫存鉛斤軍械舊有虧缺前經易棠飭令該營自行賠補除賠交外尚有虧缺鉛丸一萬四千七百餘斤之多實屬疲玩著文祥卽嚴督該營將虧缺鉛丸並所虧軍械各件趕緊賠補以重軍儲並查明虧缺緣由從嚴懲辦毋稍徇隱將此諭令知之○庚午以孟夏時享 太廟 上前期親詣行禮○諭議政王軍機大臣等張之萬奏張總愚股匪翻山南竄見飭緊躡追剿並擬移營進紮南陽一摺捻逆張總愚盤踞欒川經官軍進剿踏平賊壘該匪立腳不住翻山由大坪頭一帶狂奔張曜督兵追躡該匪由下關出馬山口直奔鎮平內鄉山內雖係震懾威亦欲勾結髮逆且頭股倪逆已由鄧州竄至新野圍撲縣城端逆一股與後股鍾得終先後攻撲內鄉縣城而陳大喜大股由鄧州永

青山孟家樓南竄亦有句合髮逆之勢宛屬西南處處伏莽張總
愚一經句結其禍蔓延僧格林沁見由嵩縣馳赴南陽剿辦並派
傅振邦統帶前敵各營所籌均合機宜惟新野係四達之區張之
萬見派永奎等前往援剿設該匪被剿他竄南窺襄樊北走葉裕
在在可慮僧格林沁自應與張之萬分投扼剿方可力遏狂氛惟
北路之防仍宜兼顧僧格林沁若久駐南陽恐漢中之賊伺隙向
東北奔竄有鞭長莫及之勢著僧格林沁酌量情形可否仍駐嵩
縣控制諸賊東北竄路而調度張曜等軍會合馬步將張總愚一
股剋日殲除並調派各軍將屬聚內鄉鎮平鄧州之髮捻及陳大
濤各股分投掃蕩多隆阿部下蕭河清常星阿等管帶之馬步約
共五千名前經諭令調赴僧格林沁軍營嗣又據劉蓉李雲麟奏
派駐紮商州之英毅六營會合藍斯明一軍赴鄂豫越境追賊此

軍入豫亦可歸僧格林沁調遣通計前後所調之兵數已不少僧格林沁酌量布置調派來豫偵賊所向迎頭截擊兼顧商維邊防毋令回竄張之萬見駐汝州應由何處會剿抑或專顧東北兩路並著該大臣相機商辦斷不可令該匪闖入腹地致官軍反落賊後又成尾追之勢官文接奉疊次諭旨計已出省督師此時鄂豫邊境羣匪聚集窺伺奔突靡定襄樊隨棗一帶均關緊要著官文馳檄各路將領認真防剿毋得稍有疏失致負委任如髮捻各匪被僧格林沁剿敗遁入楚境卽著嚴飭諸軍越境追躡會同官文派出之師併力兜剿庶兩路夾擊可收聚殲之效嚴樹森仍遵前旨將省城防守及下游堵剿事宜豫爲籌辦毋稍大意將此由六百里各諭令知之○諭恩麟奏關外匪徒聚眾滋事踞堡戕官經官軍剿捕立時撲滅並東路賊匪勾結河狄匪徒生事派兵剿辦

各一摺嘉峪關外匪首馬三娃等因甘省回氛不靖輒敢糾集多人攻陷赤金堡地方經護總兵德祥等督兵掩捕旬日之間立將全股殲擒撲滅辦理尙屬迅速至逸犯楊春係起意謀叛賊目斷不可任令漏網著嚴飭該員弁等設法緝捕務獲置之重典以絕根株河州狄道一帶回匪怙惡不悛必須痛加懲創恩麟見令道員趙必達統領新募果義營一軍五千餘人馳往剿辦並飭都司王勇等聯絡民團以壯聲勢著卽督飭趙必達等乘新軍銳氣正盛之時迅速進剿務將河狄賊匪悉數殄除庶可分道直趨東北兩路與雷正綰等合師夾擊恩麟另片奏頃接探報鳳翔回匪又復蠢動陶茂林回軍剿辦因而汧隴賊蹤紛擾各等語鳳翔回匪疊經陶茂林等剿辦據報陝省一律肅清陶茂林見已由清水等處進規平涼恩麟此奏是否係未經肅清以前情形著熙麟等確

查具奏將此由六百里諭知熙麟並傳諭恩麟知之○予四川殉
難提督占泰參將文梅勝建祠○是月減免貴州各府州廳縣被
擾上年額賦蠲緩陝西甯羌等十一州廳縣隴州等九州縣被擾
新舊額賦